

萬有文庫

第二集七種

王雲五主編

誠意伯文集

(四)

劉基撰

商務印書館發行

誠意伯文集

(四)

劉基撰

何鏗編校

國學基本叢書

誠意伯文集卷之十一

歌行

送陳庭學之成都衛照磨任

君不見。岷山導江戒南紀。噴雨噓雲九千里。瞿唐劍閣鍵重關。錦城花繞成都市。雄藩作屏鎮羗夷。列郡五十爪牙之。長夏雪山連太白。玄冬熱海蒸坤維。

聖皇握符御宸極。煙塵不起鯨波息。鳳凰麒麟在郊藪。川后嶽靈俱效職。籌邊樓上羅俊良。況子敏學年方將。將軍幕府曾試用。驍臨熟路宜騰驤。大扁揚帆泝江水。東風漫漫吹蘭芷。綵衣鶴髮對晨昏。有酒盈尊甘且旨。吾聞崕嶽上與井絡通。風氣隔閩華與戎。九夷八蠻濡帝澤。廟堂已得攻心策。

爲王輔卿郎中題雪灘寒鴈圖

雲茫茫。水浪浪。林木脫葉無稻糧。烏啼鴈叫天蒼涼。歲云莫矣江山長。有竹有竹在高岡。三株凍折兩復偃。小禽悲飛不能揚。蒼梧悠悠隔沅湘。欲往從之川無梁。願披寒霽見朝陽。勿令嗷嗷傷我腸。

漁樵問答

樵問漁。江湖風波惡。何似采薪人。無憂茹藜藿。漁荅樵。山中何所有。未若攬扁舟。得魚卽沽酒。

題王元章梅花圖

會稽老王拙且癡。能畫梅花稱絕奇。春牕走筆生古恠。中有窈窕傾城姿。人生得閑真是好。得閑不閑惟此老。布袍鬪茸髮不梳。一生只被梅花惱。天生梅實可和羹。爾梅有花結不成。世間花實總尤物。不如畫圖終古無枯榮。

琴歌贈劉元明

龍門獨樹水蠶弦。空林霜清鳴暗泉。姮娥抱桂寒不眠。離鸞怨啼風滿天。碧潭殷雷龍起蟄。月落太陰山鬼泣。湘江秋水一劍明。帝子歸來聞珮聲。扶桑浪翻碣石改。東海魚飛入西海。白雲去盡天茫茫。十二玉樓深夜涼。

二鬼

憶昔盤古初開天地時。以土爲肉石爲骨。水爲血脈天爲皮。崑崙爲頭顱。江海爲胃腸。嵩岳爲背脊。其外四岳爲四肢。四肢百體咸定位。乃以日月爲兩眼。循環照燭三百六十骨節。八萬四千毛竅。勿使淫邪發洩。生瘡癢。兩眼相逐走不歇。天帝怒其勞逸不調。生病患。申命守以兩鬼。名曰結璘與鬱儀。鬱儀手提三足老鴉腳。腳踏火輪蟠九螭。咀嚼五色若木英。身上五色光陸離。朝發腸谷暮金樞。清晨還上扶桑枝。揚鞭驅龍扶海若。蒸霞沸浪煎魚龜。輝煌焜耀啓幽暗。燠煦草木生芳蕤。結璘坐在廣寒桂樹根。漱嚙桂露芬香菲。啖服白兔所擣之靈藥。跳上蟾蜍背脊騎。插光弄影蕩雲漢。閃奎燦壁葩花摘。手摘桂樹子。撒入大海中。散與蚌蛤爲珠璣。或落岩谷間。化作珣玕琪。人拾得喫者。胸臆生明暈。內外星官各職職。惟有兩

鬼兩眼晝夜長相追。有物來掩犯。兩鬼隨即揮刀鉞。禁制蝦蟇與老鴉。低頭屏氣服役使。不敢起意爲奸欺。天帝恰兩鬼。暫放兩鬼人間娛。一鬼乘白狗。走向織女黃姑磯。槌河鼓。褰兩旗。跳下皇初平。牧羊羣。烹羊食肉口。吻流膏脂。卻入天台山。呼龍喚虎聽指麾。東岩鑿石取金卯。西岩掘土求瓊葳。岩訇洞。書石梁。折驚起。五百羅漢。半夜撥刺衝天飛。一鬼乘白豕。從以青羊青兔赤鼠兒。便從關道出西清。入少微。浴咸池。身騎青田鶴。去探青田芝。仙都赤城三十六洞主。騎鸞翳鳳來陪隨。神魃清唱。毛女和。長烟裊裊飄熊旂。蜚廉吹笙虎擊筑。罔象出舞奔馮夷。兩鬼自從天上別。後道路阻隔不得相聞知。忽聞韓山子。往來說因依。兩鬼各借問。始知相去近不遠。何得不一相見敘情詞。情詞不得敘。焉得不相思。相思人間五十年。未抵天上五十炊。忽然宇宙變差異。六月落雪水天遶。鼃鼃上山作窟穴。蛇頭生角角有岐。鱈魚掉尾。斫折巨鰲脚。蓬萊宮倒水沒楣。欂櫨柱矢爭出。逞妖恠。或大如甕盎。或長如蛟虵。光燦燦。形躩躩。叫鹿豕。呼熊羆。煽吳回。翔魑魍。天帝左右無扶持。蚊蟲蚤蠹蠅蚋。嗜膚啣血圖飽肥。擾擾不可揮。筋節解折兩眼瞋。不辨妍與媿。兩鬼大惕傷身。如受榜笞。便欲相約討藥與天帝鑿。先去兩眼翳。使識青黃紅白黑。便下天潢。天一水洗滌。盤古腸胃心腎肝肺脾。卻取女媧所搏黃土塊。改換耳目口鼻牙舌眉。然後請軒轅。邀伏羲。風后力牧老龍。告泰山稽命魯般。詔工倕。使豐隆。役黔羸。礪斧鑿。具鑪鎚。取金蓐收。伐材尾箕。修理南極北極樞。斡運太陰太陽機。檄召皇地示。部署岳瀆神。受約天皇。擗生鳥必鳳凰。勿生梟與鷗。生獸必麒麟。勿生豺與狸。生鱗必龍鯉。勿生虵與蠃。生甲必龜貝。勿生蠃與蜚。生木必松楠。生草必薺葵。勿生鉤吻含毒。斷人腸。勿生枳棘。覃利傷人飢。螟蝗害禾稼。必絕其蠖蚻。虎狼妨畜牧。必遏其孕孳。啓迪天下。

蠢蠢氓。悉蹈禮義尊父師。奉事周公魯仲尼。曾子與孔子思。敬習書易禮樂春秋詩。履正直。屏邪欲。引
頑歸入矩規。雍雍熙熙不凍不飢。避刑遠罪趨祥祺。謀之不能行。不意天帝錯怪恚。謂此是我所當爲。眇
眇未兩鬼。何敢越分生思惟。嗷嗷向瘖盲。洩漏造化微。急詔飛天神王。與我捉此兩鬼拘囚之。勿使在人
寰。做出妖恠奇。飛天神王得天帝詔。立召五百夜叉帶金繩。將鉄網尋踪逐跡。莫放兩鬼走逸入嶮巖。五
百夜叉箇箇口吐火。搜天刮地走不疲。吹風放火烈山谷。不問杉柏樗櫟。艾蒿芷蘅茅茨。燔焱熨灼無
餘遺。搜到九萬九千九百九十九。切幽谷底。捉住兩鬼眼睛光活如琉璃。養在銀絲鐵柵內。衣以文采食
以麋。莫教突出籠絡外。踏折地軸傾天維。兩鬼亦自相顧。唉。但得不寒不餒。長樂無憂。悲。自可等待天帝
息怒解猜惑。依舊天上作伴同游戲。

寄江西黃伯善兄弟

我思美人乃在洞庭之陽。彭蠡之陰。衝波亘天三百里。離恨比之應更深。揚瀾咆哮左蠡怒。白日慘慘玄
猿吟。欲往從之憤余心。竈鼉鮑脆不可以駕。風攢攢兮雨淫淫。望厭原之飛烟。邈匡廬之高岑。霞標日觀
矗南斗。石門雙闕撐綠嶽。虹旌兮翠羽。昌容兮鳳凰舞。菽衣兮藏襟。玉笙吹兮紫鸞音。望不見兮悲莫任。
江水湛湛愁楓林。西來文魚曾到海。願寄筆札逾兼金。

題安仁余氏留餘堂

君不見石季倫對案方丈皆八珍。珊瑚夜光視如土。寧知汨沒同埃塵。又不見李贊皇平生鼎食滿萬羊。
中廚煙火宵未冷。詔書趣使趨南荒。金谷名園委蔓草。平泉荆棘無人歸。繁華瞬息可柰可。空令過者寫

懷抱。世人積金貽子孫。一朝金盡難復論。古來天道有好還。君看漢代于公門。

送胡季瑋平江監倉

君不見。棠谿沙中金。又不見。龍門山上桐。衝波蕩汨入坎窞。石榴漱嚙欬雷風。梓人桃氏不見顧。自分委棄蒿樛同。一朝清廟作雅樂。搜索絡繹奔垂工。飛廉鼓鑄王爾斲。熾炭利鑿相治礪。朱絃橫絙筍簞立。鎮圭袞冕齊雍容。世間物理有消息。累土自可成穹隆。司倉雖微君莫棄。君不見。魯叟當年嘗委吏。

弋陽方氏壽康堂

先生築堂依林臯。繞屋杉松浮翠濤。烏皮靈壽扶鶴髮。項有千歲雙垂條。小孫踉蹌竹馬戲。大孫綵衣花底翺。有耳不聆闐闐音。有目不識籥領曹。鸞啼燕語日高起。羽觴沉沉浮春醪。君不見。非熊老人釣清渭。九十鷹揚亦勞瘁。

爲杭州鄭善止題蓬萊山圖

君不見。大瀛海中有神嶽如崑崙。周遣四城五十里。石骨纏繞扶桑根。琪華爛日珠炫夜。翠樓玉殿虎守關。鍾山燭龍在其北。兩眼燁煜如朝暎。仙人東王公。掌握天紀弼帝尊。長虹爲轅龍。作馬飄然乘風。白日在下。弱水蕩蕩。無力可負芥。自從大禹刻石之後。來者寡。彼秦之皇。其貪如狼。而漢之武。其欲如虎。樓船萬斛空巍巍。欲到不到風掣之。徐市蜉蝣身。乃欲邀安期。文成五利小豎子。羊質彊使蒙貔皮。神仙大咲起濤浪。射魚海上夫何爲。

壽山福海圖歌

吾聞軒轅之國。乃在大海之中央。其不壽者八百歲。壽者乃與天地同久長。樓臺縹緲造雲漢。赤日繞戶。扶桑涼。玉泉之水清以香。瑤草之味如瓊漿。洪崖有時來。環佩聲琅琅。鳳凰自歌鸞。自語青蜺。連蜷白雲舞。淋漓豹髓浮。瑤觴。璀璨金盤薦鱗脯。耳聞楚水泣。皇英眼見商郊葬。彭祖琪華玉樹宵有光。東風入律。春茫茫。春茫茫。樂無極。青離夜夜月中來。廣寒姮娥寄消息。

送人分題得鶴山

丁令威。乃在崑崙之墟。閩風之巔。羽衣謬作塵土夢。回首人世三千年。空中落日松柏冷。若霧慘慘含悲泉。夢隨回颺訪瓊田。紫雞青鴨還相憐。丁令威。將柰何。野有燿繖。隰有網羅。前飛鳥鳶後駕鵝。啄腥爭腐聲。嘍囉。渺子懷兮隔煙蘿。杳冥冥兮倚長歌。丁令威。胡不歸。槐江之山連大駝。玉樓金嶂中天開。玲瓏碧樹鏘瓊瑰。鳳凰有閣鸞有臺。君胡爲兮獨蒿萊。丁令威。歸去來。

寄宋景濂四首

我思美人。乃在仙華之山。山前夜半掛河漢。天津兩旗俯可攀。我欲從之阻河關。初平不來白羊死。瘦骨蝕盡莓苔頰。風沙蕭蕭隔人間。玄霜日夕凋玉顏。有鳥有鳥。丁令威。側身上下空孤飛。女媧石墜鼈腳折。海水散作雲霏霏。山中有奇樹。一華一千秋。美人何不折寄我。使我歎恨長凝眸。深沉洞谷山鬼集。陰氣六月冰霜留。嗟哉美人誰與儔。明年定約赤松子。與爾羣峰頂上游。

有美一人兮。美且仁。自我不見兮。不知幾春。仰玄穹兮。睇參辰。爲合爲離兮。孰測其因。青冥無階兮。江海無津。風雨茫茫兮。蛟龍怒曠。安得羽翼兮。致我與隣。

有美一人兮。美且都。青霞爲衣兮。白雲爲裾。被秋蘭兮。佩珣玕。泰和與遊兮。中黃與居。瞻望弗及兮。芳歲其徂。山高水深兮。道阻且紆。安得羽翼兮。致我與俱。

有美一人兮。在山中。蒼眉黑鬚兮。玉雪其容。飲沆瀣兮。食紫虹。澡石泉兮。灑清風。邀初平兮。從赤松。超道遙兮。樂無窮。安得羽翼兮。致我與同。

題謝臯羽傳後

阮籍哭窮途。墨翟哭素絲。賈誼上書期寤主。卞和抱玉無人知。人生有情不可塞。謝生慟哭非狂癡。神奔鬼遁天地革。龍魚貓虎三辰黑。黼裳玄袞換氈裘。鞞唱羌歌滿中國。生也何辜逢此時。有才不用空男兒。伯益丘墟管仲沒。孤根弱植誰扶持。旣不能學申胥。頓首血沾臙。卻吳再建荆社稷。又不能學鄒衍。長號徹帝關。飛霜六月淒燕山。空將淚灑荒岡雨。添作秋濤撼江浦。君不見杞梁之妻善哭夫。哭得城崩又何補。夜猿叫罷天晦冥。哭聲搖動虛危星。瀟湘竹死鳳凰去。但見白波連洞庭。嗚呼此士今安在。金石可銷心不改。應將魂魄化精衛。銜取南山填北海。

松陽周處士水壺歌

水壺者。枯蒼周處士之所以自號也。夫水。太陽寒水之凝。而壺者。器也。水凝爲冰。至柔而變爲剛。天下之剛。莫尙焉。壺之貴者。以玉爲之。雖栗而冰乎其腹。僕切異之。於是乎歌以諱焉。歌曰。

陰風吹空寒凜冽。玉壺夜半玄水結。十二樓中瑣翠鸞。太微宮裏縣明月。明月流光照玉壺。珠飛上天滄海枯。青女鍊霜封貝闕。燧人炳犀龍泣血。銀河凌澌膠北斗。五色石裂媧皇走。相看一笑天茫然。回首人

間三萬年。

寶林同講師渴馬圖歌

天廐馬。神龍姿。目如明星耳如錐。拳花鬣毛雲陸離。揚鬣掉尾頰虹飛。天廐馬。閑且驕。繫以青絲勒以鑣。渴不得飲瑤池泉。飢不得食瓊田苗。豆粟不實中腸枵。口不能語足屢躑。天廐馬。壯且武。食主之食須報主。莖秣失時。罪在牧圉。無如宋牼怨不得嚼咀。喪厥元戎殄師旅。天廐馬。爾不聞。趙國廉將軍。一飯斗米肉十斤。被甲據鞍走若雲。北斬栗腹西拒秦。負荆謝蘭不爲身。至今天下稱良臣。又不聞。漢季劉荊州。有牛千斤角曲觶。啖食十倍於常牛。負重不若一牝鹿。老瞞度江俘楚囚。骨肉解剖庖刃游。天廐馬。飽爾食。草間封狼道。誅殛威弧撥刺矢不直。嗟爾神駿須盡力。他年定遇田子方。櫪上優游終主德。

青羅山房歌寄宋景濂

若有人兮。乃在大江之南。瀨河之東。連山倚拔瀛海上。上與河鼓天津通。憶昔四女下天來。遺鬢墮髻根。龐鴻。仙華傑出最恠異。望之如雲浮太空。嶽崑崙嶺巖巖齧不可上。蒼蔚雜樹昏臙臙。虎龍咆哮號猿鶴。叫山鬼呵歛生悲風。嗟哉若人兮。胡爲乎其中。梁檀栒兮柱桂楓。結青蘿兮以峴嶂。不剪不伐兮。不監以攻。晨嵐暮藹。滴晴雨。煙條霧葉相蒙籠。綵縵兮纒纒。萃萃兮蓬蓬。繚料要紹兮。若蒼龍。垂胡降玄穹。羣麗披離兮。若翠鸞。振迅飛蕤。氈氍黃和鳴。桑扈應。髣髴牙曠之絲桐。幽泉發竇鏘玲瓏。六月赤日收蘊隆。陽凌陰蓄春融融。巖花澗草紛白紅。有時皇初平。清夜騎羊朝帝君。瓊蕤羽蓋冰玉珮。華月閃爍光成虹。松吹笙兮竹舞翻。影旆旆兮聲颯颯。娛目悅耳兮。樂不可言。世間塵土何夢夢。山有芝。隰有豐石。鑿鑿兮水滌滌。

猗若人兮美且充。飢食倦息兮。可以保我躬。逍遙兮棲遲。又何必訪廣成于崆峒。

題仲山和尚羣魚圖

濠梁之樂誰能寫。袁蟻死後無畫者。上人安知身非魚。援毫貌出態更殊。剡藤素拂秋雲冷。眼前驚見滄江永。翠尾輕披水上萍。玉鱗倒漾空中影。前行十二相迴環。吹溇煦沫淵沄間。最後羣趨儼成列。皎若寒霄舞流雪。卻思昨夜風雨來。赤鯉已去隨奔雷。鰕鱓不作霄漢夢。潛心泳暖何悠哉。贈言還畫重太息。芒鞋竹杖今何適。慎勿作海水淘湧龍嵒嶮。空令素壁凝塵生。

爲本大師題唐臨晉帖

乾符天子萬機暇。宮中扈從多儒冠。玉堂開宴出晉帖。翠氣蕩搖山雪寒。侍臣模寫各臻妙。碧樹瓊柯相照耀。令孜嗟嘆至尊喜。內官拜舞宮娥咲。日斜宴罷歸內園。外門有事人不言。君不見。關東夜飛赤白丸。昭陵玉匣秋風酸。

題老翁騎牛圖

白日上悠悠。竹梢霧已收。晴天不易得。及時當放牛。鄰家放牛多兒童。我家無兒只老翁。寒衣在機織未就。原上烈烈多高風。勿言衰老筋力簿。有牛可放殊不惡。但願天公不相惱。牛背閑眠飢亦好。

題也先進德祖母徐氏節義傳後進德之祖以戰死時其祖母年尙少

鳳乃鳳之匹。麒乃麟之儔。錦衾角枕期白髮。誰知不得同山丘。丈夫殉節殞烽矢。英靈在世何曾死。兩龍未合延平津。白日無光天色紫。君不見。青松與兔絲。引蔓相纏縈。松摧絲蔓斷。結根猶作千歲苓。洞房含

風霜露早。孤兒啞啞。在懷抱。皇天可憐兒長成。相見黃泉情亦好。

題金谷園圖

君不見石家名園擬黃屋。蜀錦作圍金作谷。暖香烘日浮紫霄。冰紈火布鮫人綃。燕釵十二歌白苧。珊瑚玲瓏綠珠舞。月榭吹笙引鳳凰。霧幄傳觴語鸚鵡。爨下蠟光宵未歇。樓上佳人碎瓊雪。空將遺恨寄丹青。留作千年覆車轍。

初夏卽景

前日大熱釋我裘。昨日一雨涼如秋。寒暄倏忽反覆手。冰炭着體何由瘳。今朝初晴又欲暖。園中草芽輒復抽。嗚呼安得伶倫吹嶰竹。四氣不愆同玉燭。

畫竹歌爲道士詹明德賦

我所思兮在瀟湘。蒼梧九疑渺無際。但見綠竹參天長。上有寒煙凝不飛。下有流水聲琅琅。中有萬古不盡離別淚。化作五色丹霞漿。穿帷貫石出厚地。風吹露滌宵有光。我欲因之邀鳳凰。天路修阻川無梁。孰知畫史解人意。能以造化歸毫芒。虛堂無人白日靜。使我顧盼增慨慷。玄霜慘烈歲將宴。鼙啼鼙叫天悲涼。我所思兮杳茫茫。山中紫筍春可茹。歸來無使遙相望。

題蘭花圖

幽蘭花。在空山。美人愛之不可見。裂素寫置明窗間。幽蘭花。何菲菲。世方被佩葢蓂。我欲紉之充佩褱。衆衆獨立衆所非。幽蘭花。爲誰好。露冷風清香自老。

送葛元哲歸江西

我昔筮仕筠陽初。官事窘束情事疎。風塵奔走僅五稔。滿懷荆棘無人鋤。明堂大開壯梁棟。散木不遺椽。稅用豫章江上一逢君。矯矯雞羣一孤鳳。城頭月出明星稀。開門望月露沾衣。文章繡衣郎。談屑天葩飛。得句卽高歌。驚起烏鵲穿林霏。星流雲散隔吳楚。有時夢君詩上語。座中百谷含清暉。牕外飄風度。踈雨我住青山耕。晚霞君去蟾宮折桂華。別來入見秋雁過。忽然會合增長嗟。江南二月草未秀。雪陣如濤衰。清晝投壺命觴盡。文友此樂百年何日又。一朝復一朝。三歲如過電。四牡彭彭子獨賢。江東山水看一遍。人間事萬不齊。我馬向南君向西。海門日照漁浦白。驪歌欲斷吳雲低。枯蒼山臨川水。相思迢迢一千里。山高高兮水深深。極望不見愁人心。應將旅魂夢化鶴。永夜月明懷好音。

題釋驂圖

關中小見勇而競。玉帳貔貅三百乘。焉知道上十二牛。皇天默佑周同姓。絳宮大厲吼如雷。墨車載甲光。照纒鷹騰二陵間。劍鋒白皚皚。壯士百戰腦塗地。元帥束縛坐草萊。俘囚有血堪釁鼓。自分殘膏染齊斧。萬死一生直望外。豈意片言由內主。鴻鴈曾傷弓。尙爲空脊愁。犀兕脫匣出。開呼肯回頭。河邊解驂徒讜謀。舟中稽首心悠悠。濟河封尸勿云晚。此事終作晉國羞。君不見夫差違子胥。空灑姑蘇泣。丈夫深戒婦人仁。養虎遺患悔莫及。

題錢舜舉馬圖

吳興公子雅好奇。欲把丹青競天巧。花蜂柳鶯看已足。貌得驂騮圖更好。浪花滿身蹄削礫。兩耳抽出春

笏尖風鬢欲拂九霄霧。隅目似掛高秋蟾。昨者王良失韉鞿。封狼咆哮蛇豕鬩。天閑乘黃越在野。出車未見歌南仲。嗚呼安得此馬背負郭令公。掃清四海歸奏明光宮。

題王元章梅花圖

道人紅顏映髭雪。欲與梅花鬪清潔。夢魂化作梅花神。貌得梅花最奇絕。高軒落筆當晴曦。北風吹樹寒雲垂。九霄露洗珠玉蕊。野水影動龍蛇枝。勞生苦被煩熱惱。見此令人暢懷抱。虛堂夜半明月入。玄鶴一聲驚絕倒。西湖處士骨已槁。湖上淡煙迷蔓草。石壇日夜長蒼苔。紫脫瑤英爲誰好。羅浮山在何處。聞道其間無散木。只有梅花三萬樹。黃初平在金華。山中白羊許借我。與爾並駕凌飛霞。

題縣幄蘭花圖

洞庭一夜西風起。沅湘美人隔秋水。翠蕤玉佩冷不收。怨入蒼梧九千里。蒼梧之山絕浮煙。上與女媧所鍊之石相牽連。瘦根迸雲石爲穿。紫莖瓊蕊涓飛泉。一開一落三千年。歲晏玄霜白日旻。南山桂枝化爲棘。我欲采之無羽翼。月宮青鸞呼不來。臥看月明空太息。

題雪汀圖

天茫茫地茫茫。雪垂日白江水黃。跋烏凍縮龍走藏。雪花如月開樽桑。被何人斯一葉航。手持釣竿詠滄浪。詠滄浪倚逍遙。天風吹入瑤池去。素女素娥應見招。

爲董楚芳題山水圖

金庭接四明。會稽藏禹穴。半嶺生白雲。如濤湧溟渤。我住城南隔天鏡。朝夕看山見山性。是誰模寫作畫。

圖展向高堂。色相曠。天上寶書緘石室。翠柏蒼筠曉。蕭瑟有蛟如龍身。九屈林深。幘疊不見日。龍氣吐爲
烟霧出。何處樓臺香。鶴中蓬萊只在雲門東。陽崖不留建木影。陰澗自起樵人風。賀知章今已矣。湖邊酒
船爲誰艤。赤城霞標通宛委。陵茗花開落松子。蕙帶荷衣歸去來。清泉素石無泥滓。

寄陶中立郭秉心敘舊言懷

爲別未五載。恍如生死隔。有時長想愁欲狂。中夜感歎無羽翼。憶昔相逢俱壯年。錢唐柳綠花含煙。粉牆
繚繞子雲宅。華燈照幙自草玄。春城飛雪滿一月。立馬敲門馬蹄沒。銅壺驍箭三十六。易坐更投鏃相挖。
仰天大咲催命觴。酒多雪急天茫茫。論文握手到爾汝。知有膠漆無參商。君行卻向江東去。我亦棲遲廣
文署。震澤風驚白鴈秋。玉山露落青楓暮。井邑蕭條却火餘。行人何處問緘書。傳聞那得辨真假。引領遙
望空嗟吁。今年飄泊越城裏。重見手書悲且喜。舊游雖在舊人非。獨立看雲淚如水。羨君絳帳開海濱。綵
衣堂上生陽春。艱危大幸適樂土。況有主翁賢且仁。嗟余數與時不偶。畫虎不成祇類狗。家鄉蕩析身轉
蓬。棄置田園事奔走。豺狼在郊蛇在藪。府縣官曹但糊口。藩垣久厭邊鄙報。旄丘載馳徒疾首。郭公子今
何如。璞中之玉可照車。委棄土壤慚砥砢。往事轉頭同過翼。猿鶴蟲沙豈終極。南山直榦劈雷電。般匠束
手無顏色。殷勤寄情素。會面未有期。願言努力各自慰。莫遣青鬢先成絲。

和吳以時秋夜長篇

秋夜長。今日何日此何鄉。流螢在砌苔在墻。明星滿天月照床。東西南北路渺茫。車何爲乎水中央。秋夜
長。今日何日此何鄉。

潛溪圖歌爲宋景濂賦

金華山水天下希。潛溪龍門尤絕奇。羣峰峻極河漢上。一峯獨立芙蓉陂。先生結廬在其下。文追班揚兼賈馬。遂令此山增壯觀。野有樸楸皆梧檟。上清道士方壺乘。輿爲作潛溪圖。丹崖翠麓神仙居。東望日出樹如蘇。溪流穿林還度谷。十里一達五里伏。龍湫吐景生白虹。藤蘿振雨松呼風。卻憶往時清夜月。帝女乘雲下天闕。鍾鏞鏗鐻蕭鼓發。霓裳羽衣飄滅沒。初平騎羊前啓行。長髯鬢影飛玉霜。秦娥吹笙玄鶴舞。牽牛河鼓凝寒芒。相思迢迢頻入夢。夢駕雨鸞從一鳳。覺來毛髮猶爽淅。目送征鴻度空碧。山有蔬水有魚。幽澗有泉清可酌。何時上疏乞骸骨。寄聲先遣雙飛鳧。

題陸放翁賣花叟詩後

君不見。會稽山陰賣花叟。賣花得錢卽買酒。東方日出照紫陌。此叟已作醉鄉客。破屋含星席作門。濕螢生竈花滿園。五更風顛雨聲惡。不憂屋倒憂花落。賣花叟。但願四海無塵沙。有人賣酒仍賣花。

題柯敬仲墨竹花石

紅桃花。天天綠竹葉。薤薤水邊石。上相依倚。恰似佳人配君子。奎章博士丹丘生。寶書鑑盡芸閣清。染朱涅翠歸墨筆。收入造化無逃形。煙濃風暖春如醉。竹有哀音花有淚。花枯竹死今幾年。空留手跡令人憐。爲包與直題太一真人圖

太一真人龐眉須。不知所持何代書。既不學。昂星降精下輔隆。準公又不學。傅說請帝通夢寐。左右商王陳範謨。眇然一葉蓮花萼。清秋風吹落泥塗。紅凋粉瘵不可扶。君何爲乎以爲桴。蕩灑九河凌五湖。誇耀

水伯驚天吳。坐令文成五利之輩。假借神聖欺庸愚。靈旗風翻壯荆符。麋鹿無鬼夫何辜。漢宮天祿連石渠。金釘銜壁麗綺疏。青藜有燄如芙蕖。何不分餉依光夜績之徐吾。高堂耽耽縣畫圖。作歌一咲駭里閭。

爲戴起之題猿鳥圖 牧谿畫

巴東之西巫山高。連峰插天關。健牢中有懷凌簸谷之波濤。藤蘿杳冥風怒號。人跡不到神鬼逃。但見野猿沙鳥羣相嘈。聳聳百竅搖巖壑。此景可聞不可遭。爾何爲乎。貌以毫毛。嗟哉用心無乃勞。江盤峽束雷雨昏。崩岷死樹纏古根。玄猿抱兒隨白猿。長臂嫵嫵相攀援。舐啖譎詭。趨騰騫。縣柯攫石墜且掀。上有滿月如頰盆。篔簹桃枝寒自蕃。嘉實不食鳳高翻。但見娥皇女英之淚痕。勢窮險盡原野闕。落日烏鴉繞雲黑。荻花茫茫蘆葉赤。前飛鵠鷓後鳧鷖。瀟湘洞庭煙水碧。騶虞鸞鷲無顏色。還君此畫長太息。獨立看天淚沾臆。

題界畫金山圖

岷山導江入海長。金山卻在江中央。下有地軸連扶桑。上有鳥道通九陽。白波繞之如雪霜。杳然浮空或低昂。但見危樓峻閣造牛斗。一似蓬萊之鏘鏘。撞金伐革般朝夕。丹雘翠葩相焜煌。巖崖洞谷蛟龍堂。斑鱗錦紋頰頰張。隱鱗窈窕變暄涼。虎蹄豹跡萬古不可到。海若夜出煙霞香。摩尼之珠明月光。目連持來自西方。謂能驅遣毒沴消災殃。轉惡爲善回妖祥。嗟我欲往不能翔。畫中忽見心飛揚。涉水有罽野有狼。武陵桃花今渺茫。浩歌一曲增慨慷。

題界畫臥龍山樓閣圖

巍巍乎大海之西。浙河之東。是曰會稽。夏后所封。吞雲吐雨。隔躔次。闔闢光景。調春冬。地平天成。五千載。職貢長與中華通。洞天石室。神仙宮。香爐紫氣。騰芙蓉。禹穴窈窕。潛蛟龍。玉書金簡。今無踪。但見蒼松翠柏。隨巖閉白日。猿狖叫嘯。生悲風。臥龍何蜿蜒。向之離立如孩童。上有朱薨碧瓦。縹緲浮玄穹。流星穿窗。月掛戶。下視水木光玲瓏。多年不見。嘗膽處。野花自落。莓苔中。綠蘋香飄。楊柳濃。漁舟一葉。波溶溶。黃冠賀老。已寂寞。澹煙細雨。空青楓。雁山狂客。意匠工。能以翰墨。偷天功。對此使我心神融。便欲築室依巖崕。短衣瘦策。尋葛洪。嘯服石髓。餐晴虹。翩然遠逐。浮丘公。不須懷古。意慘戚。伯夷綺季。俱蒿蓬。

陳彥德以畫見贈歌以酬之

君不見。昔者米南宮。又不見。今時趙學士。能將翰墨。爭鬼工。天下流傳。名父子。枯蒼處士。身姓陳。小郎英俊。尤可人。欲收大地。入掌握。筆意所到。如有神。曉携小幅。來贈我。紅日滿窗。花婀娜。開軒展視。心眼寬。如在岳陽樓。上坐。湖波吹煙。入遠山。君山乃在湖中間。蒼梧九疑。隔湘浦。孤雲目斷。幽篁斑。漁舟一葉。來何處。巫峽雨昏。啼鳩暮。澤畔行人。久不歸。沙上輕鷗。自飛去。陳公子。聽我歌。深林大谷。龍蛇多。蓬萊三島。可避世。欲徃其奈風濤何。

長平戈頭歌

長平戰骨。煙塵飄。歲久遺戈。金不銷。野人耕地。初拾得。土花潰出。珊瑚色。邯鄲小兒。強解事。枉使泥沙。埋利器。四十萬人。非少弱。勇怯賢愚。一朝棄。陰坑血冷。秋復春。朽壤食盡。蒼蛇鱗。湮淪長愧。杜郵劍。廢墜空。意春懷人。牧壘中。青鬼神入。雲愁月暗。戈應泣。嗚呼。當時豈無。故與穎。戈乎不遇。可奈何。

涇縣東宋二編修長歌

浙東行人過江左。正值蕤賓之管吹輕葭。陰氣黯黯天地閉。仰面不見扶桑鴉。谷風哀鳴灌木應。雨腳四垂如亂麻。崩湍湧溜汨奔會。平地礮鬻作臼窪。便疑桑田變滄海。流永熒眼無津涯。菅茅披猖黃竹拜。蛙黽狼籍助喧譁。滿路青泥雜隕籜。局縮畏觸蛭與蛇。破瓦荒畦舊市井。荆榛穢奧巢麕麝。翠眉蟬鬢轉蓬去。頽墻缺甃劫火燬。善淫禍福不可料。韶豔天闕令人嗟。叢祠佛殿總銷歇。但見木偶眠泥苴。前度長洲絕短澗。輿從沾濕水沒胯。寒颼瘁瑟透衣袖。雖有氍蓋那能遮。水邊老鶴學人立。鷺鷥侍傍如小嫖。廢田蔓草結旌旆。農夫盡化爲蟲沙。布穀不知時事異。勸耕終日聲查查。晚來雨歇到涇縣。只有蒿蕪無人家。縣官趨迎入公廡。筋攣骨解肉半麻。蕭條破竈冷灰燧。飢童凍口張哈呀。滹沱麥飯那能致。新豐酒醪何處賒。古稱悲歌可當哭。莫恠喉謔同兒哇。夜深月出照庭樹。鬼燐一似青蓮華。驚魂遁魄稍歸舍。收入志慮無令邪。愁雲苦霧子規叫。起坐更盼羲和車。

爲張生題趙仲穆畫馬

天廐之馬高且肥。王孫貌出真絕奇。杜陵寒儒恆苦飢。枉使韓幹遭誚嗤。渥洼天馬龍象力。朝發太蒙暮西極。豆芻五石充一食。力由食生非外得。地黃苜蓿美如飴。嚙以甘泉清肺脾。神完氣定叱止時。素餐立仗馬。耻之高風吹鴈酸。棗紅狼煙夜半通。回中爲君長鳴起。子公斬取邳支歸。獻明光宮。

爲詹同文題浙江月夜觀潮圖

君不見四時平分成歲功。以秋繼夏獨不同。炎官挾長握天柄。七月赤日熺玄穹。蓐收抱鉞躡白水。野氣

赫赫攄頰虹。陽侯喘汗。河伯喝少昊。上訴愁天公。會須萬物長養遂。期以仲月虛宵中。此夜姮娥魄正滿。命駕四蟾驂兩馱。指揮禺強出玄渚。蕩滌敲煖清靈蒙。河漢發源牛斗下。曲江上與天津通。初看一髮起。溟微如曳組。練來於東漸。聞殷麟。鼙鼓發。倏忽萬雷聲。撼風天。吳掉尾出溟洋。馬銜揚鬢。招海童。霓旌縞帳。鷺羽幘。瑤臺十二浮空濛。藥珠仙人乘玉輅。騰駕鶴鵠飛氈氈。長庚歛霍。挾光耀。電母扶龍。嗥憂銅。宓妃起舞。素女從。瓊珮綵繚雲帡幪。水綃霧縠。紛颯纒。霜旂雪旛。高翳空。鯨魚呀呷。鮫鱗遁。蒲牢哮吼。馮夷宮。瞿唐巫峽起平地。灩澦若象。慶回濼。先驅已過赤亭嶂。後從始發龕山嶺。商聲爽浙。合羣籟。澤國凜凜。寒欲凍。先生翫月坐樓上。夜氣澄。澄寂神和冲。憑闌快觀。煩暑退。呼兒命酒。澆喉嚨。自舞自歌。歌自作。月照白髮三千總。歌聲迤颺林壑。應竹樹。憂擊絲與桐。淵魚躍。波棲鳥作。紫桂繞屋。清香融。君歌曲終響未終。我歌激烈。留征鴻。瞳眸相視俱老矣。況有聚病來。交攻。聖明天子御宇宙。威惠與天相比隆。首丘倘許謝。鞿絆。猶有古月光。臙臙。行當唱和三百首。永與潮汐流無窮。

戲爲雪雞篇寄詹同文

我爲先生歌雪鶴。逸興翩翩入寥廓。先生爲我詠雪雞。扶桑晝景寒淒迷。雪鶴排雲舒六翮。長鳴遠逐浮丘伯。玄洲巨君張兩耳。蟬人踰躑走如蟻。雪雞欲上蟠桃枝。白光燦眼流瓊臍。騰身踢折琅玕樹。片片琪華振鷗鷺。鶴飛撥刺向遼東。海涼揚波雪半空。縞衣纒纒丹頂素。九臯月黑猿嗥風。雞啼喔咻夜方永。驚起跋烏怨金井。羣仙環珮響玲瓏。十二玉樓煙霧冷。憶昔康回觸折天柱時。女媧扶天立天維。坤維太白作天骨。萬古至今長積雪。上有雪蛆大穀長如轅。水蛇雪鼠相蟋蛻。味如餽饌色如乳。入口清涼生肺腑。

炎埃蕩滌邪穢除。幽精爽雪游六虛。鶴也莫與烏鴉爭腐鼠。雞也莫向溝塍拾禾黍。雪寒可畏清可欲。洗髓伐毛天所玉。雪可嚙兮冰可鑿。誰其作友三青鸞。

題米元暉瀟湘圖

米家父子皆好奇。戲弄筆墨如小兒。三百年來傳幾手。坐見銷鑠同春澌。丹青馳譽士所耻。勉強徇物寧非癡。蒼梧之山鬱嶽巖。重華往矣空寒飈。猿啼鳳去竹迸淚。白日慘淡令人悲。瀟湘洞庭連鄂渚。江漢波濤動荆楚。不見軒轅張樂時。水妃怨泣鮫人語。問君此圖何處得。中有遠意衆莫識。君不見岐陽石鼓字泯滅。千載猶爲人愛惜。

題趙學士色竹圖

竹性本孤直。聲折良可憐。由來剛介有摧挫。歲寒然後知真堅。虛堂無人清氣會。日滿高林風影碎。漆園胡蝶去茫茫。今落瀟湘蒼玉佩。我思美人淇水隈。路永莫致增悲懷。雪霜紛糅嘉實晚。不知鳳皇來不來。

送黃巖林生伯雲還鄉觀省

生兒須男不須女。二十辭家事明主。由來卿相出白屋。志士寧甘守環堵。天上巒宮古庠序。濟濟衣冠鷁鷺羽。學業須兼文與武。濟川期舟早期雨。懸髻看書困不眠。劬心問道飢忘咀。朝來忽覩林間鴉。雛飛哺母聲啞啞。慨想高堂缺溫清。稽首天關動天聽。春煙蒼茫春樹綠。水煖芹芽白如玉。扁舟蕩漾駛歸風。綵服飄揚炫晴旭。盈門弱柳鶯黃絲。鶯鳴如絃花滿枝。開門見兒喜不定。問言執手仍牽衣。牽衣上堂拜嘉慶。籩豆既具殺且時。兒前勸酒還蹈舞。親戚滿筵謹咲語。朱顏婉婉映青松。鶴髮嬋娟照芳醕。爲子歌一

曲。送子江之湄。到家早來旋。勿爲兒女慈。人生有親樂。莫樂況乃君恩重。山岳讀書不可迂。檢身不可踈。勸子慎勿學世儒。嚮言耻行名爲愚。君不見良金鑄爲器。鼎鼐亨飪干將利。才全德備稱大賢。報國榮親兩無愧。

送姚伯淵之清溪河泊所任

清溪之水通秋浦。石白水清魚可數。鱗鱗鱸魴與鱖。小魚如鍼大如杵。侵晨漁艇浮空來。千夫撒網雲煙回。鳴榔擊楫聲如雷。水怪駝啄珠宮開。課魚使者矢魚急。馮夷嘘唏龍母泣。琴高赤鯉縱有神。何暇超騰作人立。吾觀大江之中有壯魚。名曰海豨頭如豬。羣行九十其朋徒。歟沫成雨條。歟旨風俱。旌陽仙人上天去已久。平地波濤隨處有。春淵潛鱗陟負冰。時哉罔俾虞人後。小魚瑣碎獺所捐。大魚多膏祗自煎。君不見振振鷺。白如玉。沙頭見魚飢不啄。一朝飛上瑤華池。紫鸚黃鵠相追隨。俯視禿鶴垂六羽。還共野鳥爭腐鼠。

雙鯉堂歌爲唐侍儀賦

君不見魯陽揮戈回白日。又不見耿恭拜井飛泉出。精誠自古格皇天。如響應聲非異術。長江鯉魚龍伯臣。三十六鱗紅錦勻。枕丁尾丙宮淵淪。乘駕潮汐扶桑津。天憐孝子孝不匱。特勅水官宣德意。玄水躍出雙赤鯉。頃刻寒谷生春溫。之子高堂髮如絮。每懷古人心是慕。中庭鑿池專種魚。魚行圍圍隨陶朱。晨昏膳羞不遠索。翠韭金橙鱸肥白。中婦奉殮少婦進。大兒登歌小兒拍。合歡花開庭草芳。忘憂花開池水光。凌晨上馬出門去。彩袖披拂金爐香。薄暮言歸拜堂所。何況有魚甘且旨。忠孝由來同一軌。努力揚名煥

青史。

舊在杭時爲冷起敬賦泉石歌。亂後失之。今起敬爲協律郎。邀予寫舊作。已忘而記其起三句。因更足之。

君不見吳山削成三百尺。上有流泉發蒼石。冷卿以之調七絃。龍出大陰風動天。初聞涓涓響林莽。悄若玄宵鬼神語。冷然穿岵達幽谷。竽籟颺颺振喬木。永懷帝子來瀟湘。瑤環瓊珮千鳴璫。女夷鼓歌交甫舞。月上九疑啼鳳凰。還思媧皇補穹碧。排扶銀河通積石。咸池瀉浪入重溟。玉井冰澌相憂擊。三門旣鑿龍池高。三十六鱗騰夜濤。豐隆咆哮震威怒。鯨魚捷尾驚蒲牢。倏然神怪歸寂寞。殷殷餘音在寥廓。鮫人淵客起相顧。江白山青煙漠漠。伯牙骨朽今幾年。叔夜廣陵無續絃。絕倫之藝不常有。得心應手非人傳。憶昔識子時。西州正繁華。箏笛沸晨暮。兜離僭侏爭矜誇。子獨倘伴泉石裏。長日松陰淨書几。取琴爲我彈一曲。似掬滄浪洗塵耳。否咎泰來逢聖明。有虞製作超莖英。和聲協律子能事。罔俾夔摯專其名。

誠意伯文集卷之十二

四言古詩

有泉在山一首

有泉在山。爰注爲壑。膏火自煎。一室之燭。蔚彼茂林。有檀有松。有梓有桐。可以爲車。可以爲宮。有泉在山。爰注爲淵。膏火之燭。維以自煎。蔚彼茂林。有柞有械。有樗有櫟。可以爲薪。可以爲杙。

東園之柳一首

東園之柳。萋其黃矣。瞻彼白日。煥其陽矣。睠睠懷思。曷其長矣。東園之柳。萋其青矣。瞻彼白日。煥其明矣。睠睠懷思。曷其平矣。東園之柳。冉冉其華。悠悠行人。玄髮卒華。瞻彼白日。維懷永嗟。黃鸞于飛。喈喈其音。惇惇行人。悠悠其心。瞻彼白日。維懷永吟。

維澤有蒲一首

維澤有蒲。爲陳生思禮作也。陳生生七歲而父沒。母石氏教育之。甫成人而母又沒。生哀痛不能勝。輒發狂欲自盡者四五。家人守救之。獲免。翰林學士金華宋先生。爲敘其事。予聞而深悼焉。因賦詩代言其情。雖不足以附蓼莪之後。亦聊以見天理之在人心。昭昭乎不泯也。嗚乎。悲夫。

維澤有蒲。其葉濡濡。誰無父母。惘我獨孤。旻天不矜。鮮民卒瘁。我罪實訐。父母何辜。人有父母。如日如月。煦之照之。弗隕弗越。人有父母。如玄如黃。覆之載之。不遐有傷。陟彼崇丘。言采其葛。望父不見。憂心如割。陟彼重阜。予以望母。不見母兮。憂心如炙。相彼虎雉。亦各有從。矧伊人矣。罹此鞠凶。啼彼中林。爰有哺鳥。惘我人斯。云何其瘖。父兮見兒。孩唉咿咿。晨興未炊。早念其飢。母兮見兒。孩唉歡歡。草蟲宵鳴。早念其寒。既鬢既髮。綵衣有菱。父攜母將。如琬如琰。出則睹之。入則撫之。行有隍。抗式趨負之。中園有橘。離離其實。人無父母。曷其有卒。中園有梨。其實離離。人無父母。生也何爲。川水東流。蒼天悠悠。惘我鮮民。不知其尤。空山宴宴。離禽夜鳴。惘我鮮民。曷爲其生。

雞鳴一首贈宗文姪

雞鳴朝暉。草露未晞。巢鳥于飛。雞鳴夕陰。草露淋淫。鳥歸于林。雞鳴匪司時。鳥舉匪有期。氓之蚩蚩。蓋亦何思。朝露白如玉。我不敢躅。恐濕我足。夕露光如珠。我不敢踰。恐濕我裾。誰謂河弗廣。可航可蕩。風波無期。不如勿往。誰謂林弗幽。可邀可游。豺虎無虞。不如勿由。中田有禾。園有樹麻。發石有泉。可以爲家。中田有麥。園有樹核。采山有蔬。可以爲宅。

送季德大之文登稅務官任

有客有客。駕言遠行。天路脩廣。鴻鴈冥冥。淒風吹衣。白日滿庭。有酒在樽。可以怡情。云胡不飲。使我心惻。歌以侑之。百祿具并。

芄芄者麥。在彼原隰。悠悠行人。旣舟旣楫。海邦孔遐。雲霧厭浥。勿謂政難。克敬則立。勿謂俗殊。克誠則輯。

贈言不多。望企斯及。

有栢一章爲吳太常作

太常從善。七世祖諱安國。宣和中。以少卿使金。被拘。七年。不屈節。見宋史。

有栢有栢。霜露灌之。栢葉不萎。霜露何其。有栢有栢。維葉冥冥。歲暮堅冰。不渝其貞。莽彼北林。維榛維棘。玄雲四湧。白日晝匿。有狼有狐。有鴟有烏。長歲睚眦。踵腦飯膚。有颺其風。鼙捷于溟。五精相映。江河倒行。蛭矯于雲。龍羸于沙。哀此下民。亦孔之嗟。赤堇之金。鑄爲干將。不刺犀兕。孰知其良。沙棠之舟。泛于廣津。不還陽侯。孰知其神。跋彼周行。君子蹟之。猗彼葭竹。君子植之。顯允君子。邦家之紀。克崇厥履。施于孫子。嚴嚴君子。穆穆其猶。載其令德。貽厥孫謀。

黃華一首送葉師仁省兄還栢蒼

睨彼黃花。有燁其輝。驪駒在路。送子于歸。蔚彼柔桑。猗其條矣。心之悟矣。維其遼矣。翩翩者飢。亦習其羽。悠悠者途。孔脩且阻。執子之手。酌子以酒。言念言懷。勞心如料。子有兄弟。維胥維臆。嗟我之懷。曷云能極。瞻彼崇阿。維雲茫茫。之子之往。多我慨傷。鴻鴈于征。載號載飛。兄弟之遠。胡寧不悲。山川遐邈。日月逾邁。送子于歸。俾我心瘵。

春夜一首

春夜迢迢。微風不興。六合無氛。銀河欲冰。月流素波。星回玉繩。孤坐不寐。憂思相仍。壯年已謝。昔非莫懲。如彼老馬。心念超騰。道路崎嶇。勸不可能。俯撥紅爐。仰剔青燈。欲與晤語。誰其我應。

青陽一首

青陽俶載。白日孔昭。草生于野。華發于條。隨氣成形。或藁或翹。睠睠興懷。中心飄搖。麥有雉籬。藻有魚跳。嚶鳴在樹。馨管簫韶。駕言出游。以猶以陶。皤不可髻。籜不可夭。自非松栢。不能後彫。來者弗畏。往者其消。春日一首送吳浩叔大之饒州府通判任

春日載陽。鳥鳴于乘。與子爲別。思心洋洋。人生幾何。憂念苦多。仰睇浮雲。俯觀逝波。有殺在籜。有酒在觴。無曰不腆。物鮮意長。翫翫者鷗。飛鳴戾天。企賢則善。企聖斯賢。古人有言。立事惟勤。克敬勿懈。何適不臻。古人有言。顧畏民彙。綫溜摧山。患生不監。駕彼四牡。言陟太行。羊腸不債。徹在康莊。感以情生。憂由愛甚。有酒在尊。云胡不飲。春日熙熙。芳草菲菲。與子爲別。胡寧不悲。歡言悅耳。是謂疾疢。君子虞之。如矢如刃。忠言諤諤。是謂藥石。君子好之。如金如璧。相彼川水。孔淵其澄。風以撓之。黃濁山騰。有蘭有蘭。在彼幽猷。無曰不顯。其芳維遠。春日遲遲。鳥鳴啾啾。與子爲別。胡寧不懷。

條風一首

正月載陽。二月條風。繡彼郊原。載青載紅。維麥萼萼。維桑芄芄。倉庚戾止。有睨其容。二月條風。吹彼平林。翹翹雜英。如盤如綬。維麥離離。維桑陰陰。倉庚戾止。啾啾其音。三月鳴鳩。爰拂其羽。玄鳥于翔。載庭載宇。有漂者萍。亦彼于渚。睠睠懷人。繁念斯聚。維淵有魚。悠悠其逝。維隰有葦。其葉泝泝。睠睠懷人。心焉如瘵。瞻言則惟。倦言則睇。維麥離離。宜其食矣。惟桑陰陰。將其撼矣。翺彼鸚鳩。如笙如簧。澤雉于雊。繡衣錦章。殷殷其雷。霏霏其雨。睠睠懷人。曷其有與。霏霏其雨。殷殷其雷。于以永言。于以寫懷。

題蘭雀圖

有雀有雀。亦集于棘。無啄我蘭。空林多風。霜露其漙。婉彼孤芳。克貞以完。無俾荒蕪。以永歲寒。有雀有雀。亦集于枳。無啄我蕙。空林多風。雨雪有墮。婉彼孤芳。克貞弗替。無俾荒蕪。以永終歲。

秋懷八首

涼夜悠悠。華燈有輝。淒風動林。明月在帷。山川迢迢。游子無衣。瞻彼原隰。零露漙漙。靡草不凋。無木不稀。不覩逝波。焉知昨非。亭亭南山。有蕨有薇。黃華晚榮。紫芝秋肥。歲云莫矣。胡寧不歸。陟彼高原。望美中陵。玄商夕振。白露宵零。蔚彼茂草。化爲枯莖。我有素琴。玉軫朱繩。彈爲陽春。旭日滿庭。愴悵興懷。悲來填膺。子期逝矣。其誰汝聽。

嗶嗶草蟲。慄慄其股。歲莫如何。爾獨良苦。瞻望日月。綿綿我愁。如彼逝矢。一往不留。嗟爾小子。時不再得。匪緝曷魚。不藝胡稷。蕭蕭草蟲。烈烈其音。歲莫何爲。祗攪我心。

中庭有棗。疊蠱其實。零露旣降。歲事孔疾。循彼階軒。有鳴蟋蟀。豈其鬻發。而不栗烈。南山翠嶽。松栢蕭瑟。彼蘭斯蕩。彼枳斯橘。安得羽翼。載飛載鳴。汎濫八荒。以終永日。

有爝者螢。載飛載揚。有倬雲漢。載炳其章。白日易徂。玄夜何長。繁思交橫。浮念無方。慨懷古人。中心怛傷。離婁冥行。歷坎而僵。循墻以趨。雖瞽不佞。猛虎雷咆。班文在床。妖狐鬼潛。毳裘黃黃。悠悠多岐。蕩蕩周行。慎爾馳驅。天命有常。

夕簾旣清。餅水旣寒。浩歌臨風。憂來多端。懸崖而棲。瞽以爲安。菅茅在門。蒙以爲蘭。黍稷弗膳。腐鮑是餐。干將掛壁。敝履加冠。宛其悲矣。能不永歎。

鬱彼晨煙。亦曼于楚。瑟彼枯楊。策策其語。良辰幾何。亦既徂暑。溥彼郊原。有禾有黍。淒風夕興。鴈鶩如雨。今日何日。歲聿其秋。候鴈北來。星火西流。懷我故鄉。道阻且脩。俯察淵潛。仰睇天游。孰翺匪鳶。孰躍匪虬。瞻望日月。中心如抽。豈無美酒。焉得良儔。矢詩不多。聊以解憂。

山有喬木一首贈王子章

山有喬木。有條有柯。人無兄弟。云如之何。寤寐懷思。憂心實多。翩翩者鴻。行彼幽草。人有兄弟。如城如堡。寤寐懷思。戰兢以保。惟彼兄弟。一本而枝。同氣殊心。則各有思。造次弗念。參商以離。莫矜匪父。莫哀匪母。豈羔之先。孰黔之後。憂飢悼疾。中心如灸。維此哲人。秉心不回。夙夜寢興。二人是懷。如彼駉蛩。死生以借。維彼愚人。弗念厥紹。利火中焚。讒兵外挑。豆羹不平。干戈是橋。溫溫恭人。如桐如絲。宮鳴角應。羽振商隨。翁翁雍雍。融融怡怡。我尊既陳。我俎有踐。言念兄弟。中心弗殄。敬慎威儀。以謹嫵婉。有鳥有鳥。喈喈其音。拂彼叢薄。揚于中林。宜爾子孫。式昭厥心。

有鳥一首贈袁尙志

有鳥有鳥。薄言繳之。君子至止。何以樂之。有酒湑湑。亦盈于觴。明月照帷。清風滿堂。我酒既旨。我儀有秩。言念君子。溫如其日。有鳥有鳥。載好其音。君子之洽。如瑟如琴。有粟有翼。有勸有飭。古訓是式。大猷是力。有粟者璧。瑕則磨之。有紵者絲。色以訛之。如彼織紉。君子維經。如彼鋒刃。君子爲礪。無爲夸毗。無爲戚施。伊我之儂。亦子之瘠。此令朋友。交相爲助。匪中式孚。俾好作惡。有酒在觴。有琴在堂。酌言鼓之。心焉孔臧。有鳥有鳥。載翺載飛。豈弟君子。式昭令儀。業不厭脩。學不厭多。既酌以酒。復相以歌。

擢彼喬松一首

擢彼喬松。在彼丘阿。歲莫淒風。飄爲枯柯。憂來傷心。云如之何。瞻彼昊天。曷其有宜。天降淫德。痛于下國。稻粱黍稷。暨于螟蟻。不稼不穡。寇攘以食。哀此下民。曷其有極。心之憂矣。如烹如煎。喪亂靡底。如淵如泉。如彼奧草。孔蔓以延。嗚呼昊天。伊誰之愆。有尉者罍。曷施于宇。胡習于林。覲彼魴鱖。小人所慚。君子所與。弗詢弗猶。曷其有愈。君子不畏。亂日以熾。君子不憂。亂日以悠。正言諤諤。諂言諾諾。歡言孔怡。喪亂所基。邦家維車。庶民維輿。庶僚維服。大臣維御。慎爾驅馳。俾險作夷。無然汶汶。無俾車憤。無曰予知。民各有思。無曰予聖。庶民孔競。無競維德。四方之則。無爲回遙。以縱枉慝。瞻彼高原。翳翳其雲。眎彼大水。浩矣無津。嗷嗷飛鴈。各念爾羣。哀我人斯。胡肯以淪。莫高匪天。莫明匪日。何纖勿冒。何昧勿晰。維此聖人。庶民是葵。維彼愚人。則各有謀。原隰之瘁。夫婦云之。閭巷之呻。君子聞之。弗聞弗惟。則各有思。式謗式詈。臍腸以離。穀斯之秕。農以爲殃。匪鷹匪隼。曷云能翔。維天有船。不可以航。睠言顧之心。焉惻傷。相彼茂草。飛鳥依之。溟彼深淵。魴鯉歸之。靡依靡歸。胡能勿悲。我有隱憂。人莫之知。中途有棘。庶民伐之。執訊弗篤。君子聖之。不曠不贖。孰填爾聰。靡瞻靡顧。自貽伊矜。如彼沸鼎。無增爾薪。無從爾言。以逃遠人。邇人營營。遠人兢兢。弗訛爾心。曷其有懲。嗟爾君子。戒愼爾止。靡謙不光。靡盈不毀。維山有杞。維澤有芷。庶民所履。維君子使。陟彼高原。維風颺颺。靡草不凋。無木不剝。憂來傷心。如焚如抽。瞻仰昊天。曷其有瘳。

五言古詩

感懷三十一首

閑夜坐中庭。逍遙散煩襟。素月出高雲。清風來遠林。仰觀河漢流。俯聆鷓鴣吟。佇立起長歌。感歎一何深。
驅車出門去。四顧不見人。迴風卷落葉。颯颯帶沙塵。平原曠千里。莽莽盡荆榛。繁華能幾何。憔悴及茲辰。
所以芳桂枝。不爭桃李春。雲林耿幽獨。霜雪空相親。

誰云魯酒薄。邯鄲被戈矛。楚館困兩君。乃爲馬與裘。舉世共如此。太息復何尤。振衣箕山頂。引領望許由。
終然不可見。涕淚交膺流。

古人盜天地。利源不可窮。今人盜農夫。歲莫山澤空。紛紛九衢內。連袖如長虹。共咲沮溺鄙。各事游冶雄。
悠悠方自此。袞袞何時終。

啾啾草間雀。日隨黃鳥飛。爭先赴稻粱。寧顧野人機。便便善柔子。懷利近相依。但慕春莢好。不見秋霜霏。
驅車逐走鹿。中路忘所歸。豈不愛其躬。天命與心違。古道今已矣。感寤空涕歔。

柔桑生中園。婀娜當陽春。下滋靈泉液。上承膏露津。美人望蠶月。傾筐競明晨。榮盛方及時。采捋一何頻。
枯根不盈拱。何以禦霜辰。復聞芻蕘子。磨礪待爲薪。冥觀成感激。躑躅含酸辛。

無恤得尹鐸。晉陽以爲慰。馮諼勸市義。孟嘗能不危。戰國有如此。況乃商周時。漢武任桑羊。股剝盡膏脂。
向非輪臺詔。持斧空繡衣。悠悠復何道。咄咄令人悲。

伏枕候明發。夢遊滄海中。中有萬斛船。蕩漾隨天風。舵師兀昏睡。環視立衆工。波濤正洶湧。欲往迷西東。
寤寐惕驚起。魂魄猶忡忡。

蘇秦佩六印。賓從何縱橫。當時機中婦。倩咲遠相迎。黃金生意氣。蠶蠟見人情。豈無簞瓢士。今爲時所輕。種樹當中庭。不識美與惡。微陰未盈戶。枝葉猶在弱。一朝根柢成。延蔓蔽樓閣。離披引刺耗。蒙昧喧鳥雀。毀垣施斧斤。得喪亦相若。萬事不早謀。日暮徒駭愕。

東園多桃李。擢榦何交加。春秋互遞代。衰榮競相夸。械械去故物。英英發新花。花謝葉復作。空令人歎嗟。翡翠翔江湖。亡身爲毛羽。不知道傍李。尙得滋味苦。驅車上太行。還願望梁甫。高岡多烈風。茂林化爲岵。空餘澗底藤。蒙龍蔓煙雨。

淨萍不依山。女蘿不移根。草本非有心。天道更何言。如何三春子。磬折隨涼溫。朝乘晉主車。暮集韓魏門。巧咲發容輝。馳騁矜愚昏。誰見陶彭澤。桑麻滿田園。

上山采幽蘭。盡日未盈手。持贈故交人。長喚不回首。蘭花豈不芬。故情豈不厚。投之非所好。良意翻成醜。峩峩蓬萊山。渺渺大瀛水。神仙有窟宅。亦在玄黃裏。大壑多驚風。不辨龍與鯉。吹沙乘波出。洵若鯨鯢起。陽侯貫深淵。海若汨泥滓。馬衙恣饑食。罔象潛譎詭。誰能報王母。弱水不可履。羲和近虞淵。日暮空已矣。亭亭山上木。蔚蔚石底竹。諒非懷隱憂。胡爲自局促。振衣陟崇岡。高下眺原陸。鳳凰棲枯枝。稻粱肥鴈鶩。春陽悅衆目。風雨愁比屋。人主各有情。豈若麋與鹿。射干生魯崖。不識寒澗陰。池魚貫安流。寧知江海深。殷王相版築。垂名耀來今。後世重閭閻。田野多呻吟。鰕魚湧姑射。月暈滄海風。鯨鯢吐高浪。白日寒瞳矐。神仙下天闕。左右翳玉虹。金盤薦鱗脯。翠蕤擁青童。酣歌殷溟徼。魚鼈相噉嚼。忽然乘雲去。寥落寒江空。

朝登會稽山。逍遙望南訛。禹穴已蕪沒。禹功長不磨。惆悵感往昔。沉吟發新歌。誰言專車骨。冠弁高嵯峨。爲虺且復爾。爲蛇當奈何。天門隔虎豹。空悲涕滂沱。

結髮事遠遊。逍遙觀四方。天地一何闊。山川杳茫茫。衆鳥各自飛。喬木空蒼涼。登高見萬里。懷古使心傷。佇立望浮雲。安得凌風翔。

芳樹生丹崖。綠葉如雲烟。上枝蔽光景。下根蟠九泉。朝涼聒衆鳥。夕陰萃鳴蟬。豈不盛容色。及此陽春年。西風吹白露。點綴庭堦前。繁華坐銷歇。枝葉空相捐。世情多反覆。天道有推遷。金屋擅嬌寵。長門閉神仙。獻賦亦已晚。徒悲淚如泉。

我有綠綺琴。其材出空桑。金徽映玉軫。音韻鏘琳琅。上絃感薰風。下弦來鳳皇。世耳不欲聞。子期今則亡。願持獻重華。路阻川無梁。

孟軻去齊魏。賈誼之長沙。聖賢良已矣。吾道空咨嗟。徒言青松枝。不如桃李花。太息安陵子。知時爲世誇。客有持六經。翩翩西入秦。衣冠獨異狀。談舌空輪囷。獻納竟何補。焚坑禍誰因。昂昂採芝士。矯矯蹈海人。龍驤九淵外。豈復嘆獲麟。

白璧闕頑礦。淪晦同泥沙。朽壤生夜光。見者咸驚嗟。君子分寂寞。小人互矜誇。枯瘁若秋蓬。鮮豔如春華。狂風忽簸蕩。飄落歸誰家。

大道散草澤。呻吟在康衢。蔓葛自纏繞。蘭蕙日蕭疎。雞鳴出門去。薄暮還走趨。進則蚊蟻萃。退爲失羣鳥。君看拜塵友。逸氣凌東都。淒涼白首歎。千載爲嗟吁。

象以齒自伐。馬以能受羈。猛虎恃強力。而不衛其皮。世人任巧智。天道善盈虧。不見瑤臺死。永爲天下嗤。稿葉寒撼撼。羅帳秋風生。淒淒候蟲鳴。嗶嗶賓鴻驚。美人抱瑤瑟。仰視河漢明。絲桐豈殊音。古調非今聲。沉思空幽寂。歲月已徂征。

晨登吳山上。四望長嘆嗟。借問胡嘆嗟。狹路險且邪。子胥竭忠諫。抉目爲夫差。宰嚭善逢迎。越刃復相加。守正累則多。從人禍亦奢。遭逢貴明良。不爾俱泥沙。

壺公下天闕。聊以觀世紛。賣藥汝南市。時人俱不聞。顧此非我徒。飄然乘白雲。方駕雙虬龍。被服九霞文。但見北邙阪。岩峽盡高墳。

種苗甫田中。其葉可離離。上天降膏澤。溥博無偏私。人力苟不至。不如茅與茨。常恐嘉實晚。坐傷零露滋。徘徊感節序。太息秋風時。

詠史二十一首

凱風扇朱夏。草木生清涼。臥疾澹幽曠。白日悠且長。散帙觀古人。喟焉想虞唐。陽春能幾何。陰氣多繁霜。天道諒悠悠。人理亦茫茫。詠歌寄深情。歌罷增慨慷。

神樞斡元化。循環運陰陽。善惡隨氣異。禍福竟何常。朱均繼堯舜。時事已搶攘。至人妙轉移。靈瞳回晶光。祥麟踏大野。君子徒慨慷。黃星照中原。天道遂披猖。汗漫千百年。流潦浩滂滂。否泰有傾覆。霖雨見朝陽。惜無風雨收。乘時佐義皇。熙熙返大樸。濟濟垂衣裳。鼎湖去不復。歎息空哀傷。

野馬不象食。疆受組與羈。低頭衡軛下。各自東西馳。秦人任法令。斬艾尊君師。六合始一家。恩愛已乖離。

一旦山東客。揭竿以爲旗。叫呼驪山徒。天下響應之。素車拜軹道。誰復爲嗟咨。
周昌勇庭諍。子房善奇謀。王陵抗高議。平勃終安劉。經權兩不廢。道立知亦周。
焯焯東都士。節義明清秋。孰知讒佞巧。舉足觸戈矛。顧此悲世運。泫然涕交流。
食毒偶不死。謂言堇可餐。墮河偶不溺。謂是天所完。侈心不自顧。利欲紛多端。
百勝困一躓。名滅軀體殘。君子戒微幸。小人樂災患。不見瑤與羽。千載遺悲酸。
燕昭志報復。金臺求俊賢。下齊如破竹。大恥雪九泉。六王死灰人。安可與比肩。
奈何驕氣盈。妄想彼神仙。安期不可致。卽墨火已然。煌煌召公業。委棄如浮煙。
天狗吠梁野。七雄扇妖氛。吳徒二十萬。剽若狼虎羣。鼓行破棘壁。長驅似輕雲。
漢將三十六。朱旗耀天垠。救梁不奉詔。太尉眞將軍。遂令千載下。知人稱孝文。
哀哉潼關戰。百萬徒紛紜。平居觀羣物。紛紛爭朵頤。口舌不能勝。兵戈遂相隨。
古來豪傑士。于今安所之。大運一朝至。孰分賢與蚩。所以四老人。去采商山芝。
清風扇六合。百世眞吾師。景公返雀巖。晏子稱其仁。鰥寡既有室。長年不負薪。
焉知子玉節。遺禍逮天倫。推恩限目見。太息此君臣。田橫不事漢。刎頸送咸陽。
二客旣穿冢。島中皆自戕。雖非中庸道。要亦有耿光。英雄久淪沒。世俗但炎涼。
嗟嗟翟廷尉。慷慨令人傷。

吾聞共工臺。乃在崑崙北。長蛇戴九頭。利吻錯戈戟。哇呀恣啖食。抵厥成溪澤。
嗚呼三仞沮。可以警貪得。四七續炎運。漸臺殪狂新。建侯首褒德。拳拳念生民。富春有遺老。終竟不爲臣。
遂令節義士。視身若埃塵。

前車屢折軸。後駕無迴輪。不有綱黨禁。何由起黃巾。爲邦貴知本。明主宜書紳。

建光悖祖德。封爵逮閭閻。忠良坐荼毒。隕涕盈道路。南巡旣不返。狡窟寧久固。功成十九侯。事已非細故。況聞用骨鯁。乃以浮陽疏。中官旣世襲。山陽更媯妬。時事亦可知。君子獨未寤。美哉吳長史。衡門掩秋露。當途亂天紀。赤帝懸空名。寧知辟掾日。禍機已潛萌。晉主念私勞。荀馮巧相迎。撫床竟不寤。骨肉成鯢鯨。好還實天道。狙詐徒人情。

香餌獲死魚。重賞致死士。自古以爲訓。世俗寧知此。陳湯困刀筆。壯夫皆切齒。如何中興主。終竟惑薏苡。隋帝易廣勇。天命以不長。唐宗昧治恪。本支竟摧戕。聖人有達節。變通亦何常。禹湯不同跡。萬古皆明王。永嘉昔潰亂。南渡馳五馬。長江畫天塹。九廟扇灰燼。豈無運甓人。亦有誓江者。智池不揚波。靈物棲曠野。哀哀黍離淚。空向新亭灑。

藁門翳蓬蒿。窮巷絕馬跡。中有抱膝人。疏糲不充食。榮華過浮埃。敝服無慍色。獻玉鄙卞和。扣角羞寧戚。天潢不垂雲。中夜起歎息。

吾愛閔仲叔。幽居翳茆茨。應辟思濟世。利祿豈其私。進當致堯舜。退則老蒿藜。焉能犬馬象。以爲天下嗤。美人皎如玉。挾瑟升高堂。泠泠向長風。操作孤鳳凰。曲度未終竟。玄雲蔽穹蒼。走獸駭赴林。飛鳥號且翔。高山與流水。日莫空淒涼。

夫差臥薪日。勾踐嘗膽時。人生各有志。况乃身踐之。寧知姑蘇鹿。已與西施期。空令千載下。痛恨於鴟夷。

游仙九首

日月如過翼。瞬息春已秋。何不學神仙。縹緲凌虛游。雷霆以爲輿。虹蜺以爲輶。清晨登闕風。薄暮宿不周。長嘯層城巔。濯足翠水流。俯視八極內。擾擾飛蜉蝣。

今日何不樂。振策登高山。深林仰無見。藤蔓陰以繁。鼯鼯繞樹啼。黃鶴空飛翻。攬轡向西北。思欲赴崑崙。瓊樓十二重。豹虎夾陞闈。青鳥去何之。誰向王母言。徘徊歲華晚。感激生愁怨。

岐陽隱孤鳳。寰海騰蛟蛇。不食松栢實。而采日及花。翩翩柱下史。望望之流沙。麻姑何爲者。乃降蔡經家。神龍集洿澤。取啖於魚蝦。

費生市井兒。未嘗識神仙。偶然壺中去。謂是別有天。幻化且不解。真訣安能傳。那將食色身。妄弄刑賞權。果然失符後。衆鬼不見憐。

天高河漢清。露白秋宵永。朝華炫紅芳。蠃蛄弔馳景。繁思靡志帥。內疚積心梗。涉江無方舟。汲井悲短綆。歲莫霜雪寒。泣涕沾項領。

秦皇煽虐燄。烈烈燔九州。平原曠如赭。鴻鵠安所投。所以避世士。慨想乘桴浮。樓船載偃子。去作汗漫游。何必蓬萊山。遠人卽瀛洲。虎視徒逐逐。竟死於沙丘。

娟娟姮娥女。灼灼芙蓉姿。一入月宮去。千秋閉蛾眉。涼風清玉除。碧雲生桂枝。鳳歌不可聽。長夜有餘悲。晨登女床山。西北望崑崙。樓臺似霄漢。金碧氣魂魂。素女三千人。灼若扶桑暎。鸞笙引鳳舞。雲旒隨霓旛。

老童發清歌。昌容戲紫鷄。神荼獻丹桃。洪崖開玉尊。蜚廉漫崔嵬。建章空千門。大道久已晦。誰能識仙真。如何賣藥翁。恠語驚市人。日月空明照。朝菌非大椿。已矣復何道。去去生愁辛。

感寓六首

暑退生夕涼。褰衣步微月。風來竹陰動。草暗螢光發。佇立忽懷人。江河渺難越。庭前金鳳花。向晚爭媚嫵。但見白露滋。豈知繁霜苦。芳時良可惜。此物何足數。白露下木葉。淒涼江海秋。江臯有鳴鴈。噉噉安所求。稻粱日蕭索。風雨徒離憂。一日復一夕。一夕復一朝。青燈向暗壁。光燄坐自消。鞞鷹鍛六翮。絕意於雲霄。嚴霜隕與草。蛇虺去所依。可惜蕙蘭花。與之共頹萎。顧此悲世運。泫然涕交頤。淒淒素秋霜。苒苒高原草。運窮相值遇。黜顏就枯槁。浩歎采薇歌。慚愧商山老。

招隱五首

浮景無根株。逝川不可留。昨日瑤草春。今朝蓬梗秋。暴食豈不美。醜毒潛戈矛。華軒豈不貴。長路能摧輜。子胥棄吳江。屈原赴湘流。韓彭竟菹醢。蕭樊亦累囚。何如張子房。脫屣萬戶侯。深韜黃石略。去從赤松游。秦皇火六籍。黃綺之商山。漢帝握乾符。羊裘竟不還。古來遜世士。冥心丘壑間。於時苟無用。安事空摧顏。石泉清以芳。白雲寒更閑。春蔬雜甘辛。秋果羅青殷。濁酒晚自酌。柴扉晝恆關。嘯歌陟崇岡。濯足臨潺湲。金馬我何榮。羊腸我何艱。鴻鵠翔九霄。逸然不可攀。

豫章長千仞。挺生崇崖陰。布葉連青雲。交柯蔽層岑。結根豈不固。斤斧將見尋。有栢生石間。屈曲叢灌林。古根鬻飛溜。電火焚中心。大不中梁柱。小不堪瑟琴。風霜自搖落。偃蹇獨至今。流水千百折。白雲三四峯。上有噴壑泉。下有凌霜松。中有一老人。坐嘯巖間風。素髮垂兩肩。朱顏映青瞳。

年紀將百齡。容貌如孩童。長跪前致辭。子非列仙翁。咲謂汝孺子。語汝使心通。我生不偶俗。遺身在蒿蓬。結廬白水邊。采藥青林中。世語我不接。世士我不逢。簞瓢我不憂。軒蓋我不崇。自耕足我食。自息安我躬。冥冥絕思慮。默默全和冲。持此攝吾生。仰荷元化功。何必插羽翰。遠逐浮丘公。再拜受斯言。廓然如發蒙。投簪謝知己。一去無回蹤。

有客款我廬。身披紫雲袍。鳴騶列前後。從者皆俊髦。坐我蓬幕下。向我談伊臯。手斡北斗魁。足踏東海鰲。高視六合內。泰山等毫毛。揮袂起謝客。且還飲我醪。醉臥不知曉。衡門塞蓬蒿。

雜詩四十一首

江籬生汀洲。香氣何清婉。欲采寄所思。不憚道路遠。疾風吹塵沙。山澤蛟蛇混。誰復惜芳菲。空悲歲年晚。小魚頭如針。大魚須如松。小大各生育。孰私天地功。坤靈發淫怒。溟海簸驚風。大魚食小魚。陂池爲之空。陂空水亦竭。小大相唼嚼。但見灌莽間。顛骨成崆嶺。殘膏飢螻蟻。孰辨鯨與鱖。

僂婦厭貧夫。常懷相棄心。慨慕東家子。年少多黃金。輕身改西託。布被爛錦衾。寧憶秋風起。霜露凄繁林。葉落枝亦盡。愁聞蜻蛉吟。

雲月雖不明。精魄固長在。飛蛾亦何知。乘時妬光彩。天高多飄風。煙霧中鬖鬖。紛紛隨蒿棘。終竟爲何罪。人生如浮雲。飄搖無根蒂。昨暮青山阿。今朝滄海澨。風波無定時。淪躓難爲計。是中苟不爽。曷問耿與鬣。申胥存楚國。仲連卻秦帝。此士雖則亡。英名千萬世。

渴人常夢飲。飢人常夢餐。中霄羈旅夢。兩臂生羽翰。騰身入紫青。吹面天風寒。驚覺凜毛髮。感我涕洟瀾。

吾觀神龍變。天地爲晦冥。龍成宰元化。嘉澤浹四溟。出山不飄風。入水無雷霆。枯萎仰沾溉。沃若生葱青。豈比蜃與輪。裂石摧巖陁。俾民舉疾首。抗神蹙眉顛。鷹本是鷲鳥。爪利翻勁疾。胡爲化爲鳩。鈍拙無與匹。棲遲荆棘間。粒啄營口實。暮啼墻角雨。朝啼屋頭日。昔爲衆鳥畏。今爲衆鳥啣。運命苦不常。孰爲金石質。

愚公志移山。精衛思填海。山高海茫茫。心事金石在。松柏冒雪霜。秀色終不改。春陽熙幽林。卓立有光彩。急雨漲潢潦。溝池成五湖。青蛙與耿聒。得意鳴相呼。自謂樂無似。至足不求餘。蓬萊有玄鶴。曾見東海枯。清夜輾長風。哀音繞天衢。使我起太息。黑鬢變霜鬚。

空庭生夕陰。高閣留返照。歸鴉集紛紛。棲雀鳴嗷嗷。冥思觀羣物。肆目展遐眺。草樹蔚參差。雲霞相輝耀。慷慨商山心。想像蘇門嘯。大鵬搏扶搖。斥鷃翳蓬蒿。悠悠共淪汨。潰潰堪一咲。

惟豺知祭獸。獺亦知祭魚。豺獺有報。本人道當何如。華堂飫玉食。盜賊塞中塗。那能不自媿。而以耀庸愚。吁嗟千載下。枯骨空專車。

雷藏蟄蟲伏。雷動蟄蟲起。蟲雷不相期。冥契非人使。英雄應有時。何異羶致蟻。神劍無風胡。銅花蝕泥滓。種荷淥池中。荷生葉猶紫。掠萍逐蛙蠧。恐畏傷荷蕊。荷心有露珠。的皪無泥滓。荷根有藕絲。纏綿誰得似。陰崖有喬樹。乾鵲巢其顛。朝食葉上露。暮食葉下蟬。巢成長衆雛。鳴飛一何嬾。但願本根固。風雨得安眠。如何就搖落。而不抱惜悁。

蒼蠅眼畫明。蚊蟲眼夜明。明眼利口觜。晝夜無時停。拍死紛籍籍。飛來更營營。一旦霜風起。稜威肅天刑。

飛者不復飛。鳴者不復鳴。雖有太陽光。不能煦其生。乃知天勝人。智力徒鬪爭。

豺狼食人肉。蚊蟲食人血。食肉死須臾。食血死不輟。哀哀露筋女。肉盡惟皮骨。誰謂蚊蟲微。積鏞能銷鐵。蟲母羽蟲孽。與人無怨尤。胡爲含毒害。吐蚊吼如牛。紛紛散草澤。解解森戈矛。無辜受螫蓋。皮破隗血流。覆巢或有令。未應後鶴鷗。

黃鷹食鳥雀。山雞食蟲豸。蜂食花上蜜。蝦食苔間滓。兔食茅草根。鳳食梧桐子。所嗜由性成。易之則皆死。冥觀付一咲。誰與窮茲理。

魯陽仰揮戈。羲和爲紆轡。耿恭俯拜井。湧液出荒地。精誠所感格。高厚靡不至。人生亦良難。如何殄其類。蓬蒿滿六合。慚愧真宰意。

在昔信陵君。謙勞實弘度。好士天下稀。賓客遠傾慕。救趙奪兵符。掃清邯鄲霧。歸來存大梁。秦甲響東顧。魏王木偶人。朽心自成蠹。讒言一以入。危石不可據。日落西河陰。歌鍾怨零露。

天鷓巢蒿草。形軀纖且微。不知懷何事。直上聞天扉。啾啾終日鳴。天聽不可希。鑿羽口吻裂。落日空悲啼。雉死爲從雌。鴉死爲鬪力。蜜蜂死洩憤。鵬鳩死求食。象犀好齒角。玃豹美毛色。紛紛死相藉。殺身奉華飾。自取夫豈過。外至良可惻。獮獍合族烹。梟鴟宜卵殖。山林久穢蒼。誰復繼禹益。

天風觸萬竅。小大皆有聲。律呂與懸匏。嘈嘈同一鳴。人情有所鍾。聲氣爲之使。無知而強聒。則亦懸匏耳。殊俗耳胸臆。比之芻牛腴。殷勤奉賓客。自謂敬有餘。鷓嚇雖異貫。亦惑誰能祛。霾陰蔽玄象。清渭混汙渠。誰能繼夏后。再分龍與魚。

大星出西方。睽睽如明月。兒童驚指示。草木見毫髮。夜久斗柄迴。人靜涼風發。徒倚步中庭。空烟散成雪。楚人將適蜀。揚帆信江水。江關多西風。帆逸行不止。日暮入海濤。極目無涯涘。鯨魚吹高浪。舵折檣竿圯。頓足空號呼。烟波千萬里。

冲霄難爲羽。泛海難爲舟。縛羊駕戎輅。猛志空悠悠。農時失耕耨。何以望有秋。決藩盜菽粟。鷹隼不如鳩。韶華不我與。去若川水流。歲莫獨彷徨。凜凜懷百憂。

爰居避風翔。豈冀黍稷祀。臧孫強自用。取咲於君子。拾蟲養鳳凰。將以爲觀美。徒令翬翟畏。長逝深林裏。神仙不世出。螻蛄咲蜉蝣。嘉禾曠膏澤。穉稗矜有秋。驅馬將焉往。荆棘滿崇丘。玄陰結嚴冬。芳意坐自遄。鴻鵠從何來。哀鳴聲啾啾。願欲適縣圃。路阻迷所投。況我孱懦成。引領空憂愁。

桓温一老兵。豈識捫虱士。擁衆臨上流。竟作跋扈鬼。符堅氏羌豎。何能作天子。眈眈視中原。爲有景略耳。知人聖難之。求賢任虛已。袁曹豈力敵。生死一彈指。惆悵後來人。慷慨前車軌。

英英木槿花。振振蜉蝣羽。乘彼三秋露。及此六月雨。容好能幾時。生成亦良苦。十年構阿房。一日化爲土。染鬢作童顏。於身竟何補。不如順天命。保己良多祐。

天地若大甕。萬物生其腹。人猶腹中蟲。蠢蠢隨化育。鑽攻無時休。臟腑爲翻覆。帝青調元氣。豈不畏戎毒。幡然命滌蕩。汗下兼湧衄。蚩蚩自狂獪。涓沸交殺戮。何當瞑眩定。風止水歸瀆。鑄鐵作鋤犁。春耕待秋熟。二儀播元氣。晝夜靡停機。有生卽有死。化工亦何私。彼狂牽所欲。冥行失康逵。無航思利涉。發此百禍機。賊人還自賊。擾擾竟何爲。

郭南有窮夫。黃髮對老妻。見人抱兒女。仰面看天啼。郭北有宕子。鮮服明春閨。累累倚門親。疏茹乏鹽醯。盛年異欣戚。薄暮空噬臍。達生貴知命。胡爲苦悲懷。咬咬水中鼻。谷谷墻下雞。良無返哺望。乳菹何棲棲。瞑目思此理。惆悵中自迷。

盜跖餒梁肉。原思餒窮閭。夷齊采薇蕨。儀秦駟高車。祥麟殮西狩。尼父空嘆吁。天道果福善。彼蒼竟何如。老眼眯昏夜。見螢以爲燈。燈螢何足辨。所悲老且瞽。瞽老復何用。甘心就無能。逍遙麋鹿願。所得良已弘。鬼神陰陽精。變化無定迹。如能禍福人。豈向人求食。而況天地心。坦坦甚正直。祭祀本人情。將以牲與稷。居歆豈在物。馨香薦明德。葛伯信不臧。虞公亦何益。前王有舊章。敬之在無射。

海鯨乘扶搖。激水騰九旻。退潮觸泥沙。顛骨空嶙峋。猛虎掉尾行。飲血不滿唇。跳哮逞雄攫。係首八尺緡。賦命雖在天。成之亦由人。嗟嗟燈上蛾。亦豈厭其身。夷齊值明時。餓死西山陽。四老生亂世。采芝以徜徉。李業遇公孫。欲蓋反受殃。嚴陵辭故人。萬古清名揚。性也實有命。君子順其常。漫漫雲間鳥。冥冥隨風翔。海宇豈不寬。六翮有短長。浩歌向日月。曲盡意茫茫。

感懷

昊天厭秦德。瑞氣生芒碭。入關封府庫。約法唯三章。英雄不世出。智勇安可當。叔孫一豎儒。綿蕞興朝綱。遂令漢禮樂。遠媿周與商。逝者如飄風。盛時安得常。寤寐增永歎。感慨心內傷。四月陽用事。羣物咸長榮。靡草雖就死。王瓜亦復生。死生誰所致。時至莫能爭。聖人洞神理。守分無外營。脩身俟天命。萬古全其名。

自都回至通州寄普達世理原理二首

巨辭文明門。回首望宮闕。長雲擁蓬萊。烟霧中滌鬱。相去不崇朝。杳若隔溟渤。扁舟指吳雲。離夢縈燕月。雖懷歸鄉歎。復愴知己別。裁詩寄悠悠。感念深至骨。

西風吹青冥。征鴻暮蕭蕭。一辭都門去。便覺京國遙。輕霜入秋鬢。落英罄寒條。念我同年友。高誼薄九霄。恨我處遐遠。不得陪晨朝。綿綿久要心。萬里匪爲遼。鱸魴赴清澗。孔翠依蘭苕。飛潛各有適。分得無外徼。佇立望閭闔。傾耳聆簫韶。

晚至草平驛

落日照阡陌。秔稻生清香。好風自西來。吹我征衣裳。但惜景物佳。不覺道路長。幽禽韻蒙茸。馬足響康莊。驛吏迎我前。拜跪進酒漿。要我入山館。左右華鐙光。解鞍待升月。星明樹蒼蒼。

送僧家奴參政赴河東宣慰使

晨登晉陽山。西北望雲中。大漠造瀚海。重關阻飛鴻。昔爲征戍場。今見車軌同。相公奉明詔。分符總元戎。賦詩睇行雲。坐嘯生長風。霜濃曙角清。月出黃河空。細草臥牧馬。虎服韜弧弓。天子萬歲壽。垂拱明光宮。發安谿。至青田。戎事急。不得留有感。

雞鳴戒晨裝。掛席日尙早。風亂沙上雲。雨昏江中島。士生從王事。薄質非所寶。但懼筋力微。任重躋遠道。昔邁園柳青。今來江楓老。豺狼互滅沒。憂虞何時了。朝原思脊令。夜船夢萱草。寸步隔河山。怒焉傷懷抱。天壽節同諸寓臣。拜于寶林教寺禮畢登槃翠軒分韻得稽字。

宿雨霽初節。羣山綠如洗。流霞絢琳宇。旭日射丹堦。鳴鍾趨梵宮。焚香望天陞。遙遙蜂蠅忱。惓惓葵藿禮。萬年主壽長。百拜臣首稽。竣事陟華軒。敦情屬芳醴。太師祇園英。聰明實神啓。諸公俱俊髦。文藻壓班福。肅雍周簠簋。古恠夏追蠡。鹿鳴歌苹蒿。魚麗詠魴鱧。劍氣星有輝。珠光海無底。嘉會非尋常。令德更豈弟。澄心映空曠。滌慮俯清泚。看竹風泠泠。折花露泥泥。紆徐睇溟瀛。緬邈想淮濟。巍巍世皇業。喬嶽深根柢。螳螂亢齊斧。碎首堪立後。農郊卜甘歲。已喜先抽薺。層樓盼北極。祥光應周髀。中山致麴蘖。東吳來秣米。宴醑定有期。玉釭浮盎醜。

題蘭花圖

亭亭石上竹。嫋嫋竹下蘭。歲晚各自媚。不知霜露寒。欲持贈君子。路永江海寬。空山日搖落。佇立起長歎。正月一日公宴分韻得恩字

青陽肇嘉歲。白日間春溫。起視天宇間。粲然生意存。高堂建華蓋。北面朝至尊。彤雲暎扶桑。條風吹我幡。鳴絃在兩楹。旨酒盈金罇。轅門號令肅。主將詩書敦。彬彬衆多士。矯矯鳳與鷄。廟算得其長。豺狼安足吞。揆予實穢碌。深慙廁璵璠。敢矜鉛刀割。所望安黎元。恢復舊土疆。以酬生育恩。

誠意伯文集卷之十三

五言古詩

種藿香

藿香體虛柔。本自南土出。毛芒散纖葉。旖旎怯朝日。芳菲挺衆卉。辛美更無匹。況能已疢癘。兼理腸胃疾。種之近庭階。離離看新茁。驅童斬竹枝。扶植待秋實。常恐風雨惡。摧折傷弱質。蒺藜生道傍。延蔓何綿密。豈無荷鋤人。夕薤旦已出。上天意何如。感嘆靡終畢。松柏多斧斤。山林日蕭瑟。

北上感懷

倦鳥思一枝。櫪馬志千里。營營勞生心。出入靡定止。伊余朽鈍材。嬾拙更無比。才疎乏世用。嗜僻惟書史。雖非濟時具。頗識素餐耻。旣懷黎民憂。妄意古人企。寧知乖圓方。舉足輒傷趾。塵埃百病侵。貧窶萬感累。艱難幸息肩。遲莫竊所喜。明時登驥驟。駑馬但垂耳。自非冀北姿。莫羨追風駛。便欲解衣冠。躬耕向桑梓。終懷葵藿戀。不慕沮溺詭。潛陽動原隰。白日躑蘭芷。疇雞戒晨鳴。客子駕行李。縈紆越巘嶠。浩蕩涉風水。淹留具區北。信宿滄江汜。維時連年歉。道路多流徙。官司職撫字。黔首皆赤子。陳紅太倉米。豐年所儲儲。爲民備乏困。朝廷豈私此。推餘補不足。茲實王政始。臣子宜奉承。天威不違咫。奈何簿書曹。暴慢蔑至理。苟云出納客。當閱穀觶死。嗚呼草莽露。慘惻溝瀆委。聞之猶鼻酸。見者宜顙泚。踰淮入大河。淒涼更難視。

黃沙渺茫茫。白骨積荒蕪。哀哉耕食場。盡作狐兔壘。太平戢干戈。景物未應爾。意者斯人徒。縱欲擾天紀。鬼神赫震怒。弩戾良有以。去年人食人。不識弟與姊。至今盜賊輩。嘯聚如蜂蟻。長戈耀白雪。健馬突封豕。豈惟橫山澤。已敢剽城市。途行絕稀少。空車但墻倚。身行須結集。一寐四五起。牧民豈無人。司寇亦有氏。陣車不驅馳。大田無耒耜。邦家祿食恩。豈爲臣奉已。山東古要地。燕趙猶唇齒。況茲南北衝。津梁通遠邇。屬當全盛時。四海同一軌。廟堂多稷契。振舉無遺弛。勿云疥癬微。不足成瘡疔。滔天起濫觴。炎岡發星炬。虞朝有分北。漢庭煩直指。農夫植嘉穀。所務誅稂莠。耕耘苟失時。雨露空沾灑。威懷豈異任。守令職非瘳。端能慎黜陟。此輩何足弭。故鄉隔山川。前途塞荆枳。青徐氣蕭索。河濟俱泥滓。痛哭賈生狂。長歎漆室裏。何當天門開。清問逮下俚。

送普顏子壽赴廣西憲幕

離維荆衡南。迤迤走蠻徼。民風雜徭蠻。地勢帶蒙詔。迢迢商周前。風水絕纖竅。後王務廣土。懷柔倚攻剽。羈縻非本情。疲痾復誰療。大明倅日月。幽裔靡不照。化育之所加。欣榮及蓬蘞。憲府繩百司。選擇自廊廟。偏方異習俗。賦性實同調。培養自殊途。激揚貴知要。淒涼溪上瀧。鰈魚困罾釣。高風吹霜鶴。縹緲集海嶠。願言崇令業。以繼南國召。

過東昌有感

夜發高唐灣。旦及東昌郭。喬樹拂疎星。霜飛月將落。仰觀天宇清。平見原野廓。白楊號悲風。蔓草杳漠漠。但見荆棘叢。白骨翳寒籀。聖道縣日月。斯人非虺蜮。教養旣迷方。欲熾性乃鑿。展季骨已朽。清風散藜藿。

絃歌滅遺音。爾絲盡籠絡。鴟嘯魍魎憑。螽鳴草蟲躍。遂令一變姿。化爲跼與蹻。沉聞太行東。水旱薦爲虐。飢氓與暴客。表裏相倚着。賑卹付羣吏。所務惟刻削。征討乏良謀。乃反恣剽掠。坐令參苓劑。翻成毒腸藥。今年秋租登。行止稍有託。餘波尙披摺。未敢開一噓。但恐習俗成。何由返初昨。藩宣有重寄。胡不慎遠略。往者諒難追。來者猶可作。歌詩附里謠。大猷希聖莫。

南陵崔氏思梅詩

昔來梅花下。綵服輝清尊。今來不見人。淚滴梅樹根。梅落風不回。落淚化爲石。冥冥入幽泉。一夜千萬尺。

晨詣祥符寺

上馬雞始鳴。入寺鐘未歇。草際起微風。林端淡斜月。僧房湛幽寂。假寐待明發。松徑斷無人。經聲在清樾。送鄭希道行省掾滿之泉州錄事

鄭君廊廟姿。才識天下冠。若華升朝霞。可望不可翫。胸中富文史。蔚蔚錦繡段。公餘但好客。高論幹雲漢。蓮風散秋幕。薇露收夕案。吳雲翼行鞞。閩嶠入奇觀。撫字後深仁。剗繁讓明斷。嘉會復何時。悠悠仰飛翰。寄題僕世本東溪漁唱亭

落日去屬巒。清溪澹輕浪。嘔啞戢柔櫓。款乃發孤唱。初隨飄風起。復逐行雲颺。月色照未闌。灘聲雜逾壯。恐有濯纓人。一聽一惆悵。

發安仁驛

雞鳴發山驛。天黑路彌險。煙樹出猿聲。風枝落螢點。江秋氣轉炎。嶂濕雲難斂。佇立山雨來。客愁紛冉冉。

發龍游

微颺獻輕涼。客子中夜發。秋原曠無際。馬首掛高月。草虫自宮商。葉露光可掇。狹徑非我由。周行直如髮。揚鞭望南天。晴霞絢閩越。

早行衢州道中

草際生曙色。林端收暝煙。露花泣啼臉。風葉彈鳴絃。農家喜銜艾。行歌向東阡。大道無狹邪。平原多稻田。客行良不惡。敢曰從事賢。

鉛山龍泉

茲山近南服。勝迹冠朱方。石骨入海眼。地脈通混茫。金精孕清淑。水德融嘉祥。寒含六月冰。潤浹九里長。鯨顛狎獵起。虎口咭呀張。發竇既窈窕。流渠遂汪洋。洞徹瑩玉鑑。鏘鳴合宮商。靜含玄機妙。動見大智藏。養德君子類。膏物農夫望。野僧向我言。其功殊匪常。飲之祛百邪。能使俗慮忘。漱嚙入靈府。喉舌生清香。爽淅動毛髮。飄忽凌風翔。何當揚湛冽。盡洗貪濁腸。

初食檳榔

檳榔紅白文。包以青扶留。驛吏勸我食。可已瘴癘憂。初驚刺生頰。漸若戟在喉。紛紛花滿眼。岑岑暈蒙頭。將疑誤腊毒。復想致無由。稍稍熱上面。輕汗如珠流。清涼徹肺腑。粗穢無纖留。信知殷王語。瞑眩疾乃瘳。三復增永歎。書之遺朋儔。

望武夷山作

飲馬九曲溪。遙望武夷峰。長林抱迴合。丹崖造空濛。浮暉澹寒翠。水木皆曼容。薄遊限塵務。促景尼奇蹤。緬懷紫陽子。千載誰與同。瓊佩邈煙霧。石函闕遺封。羈猿怨幽澗。飛蘿冒芳叢。瑤琴空流泉。桂枝徒秋風。悵望佳期阻。纏綿憂思重。殷勤尺素書。願奇雲間鴻。

發白沙至水口

夜發白沙驛。亭午至水口。中流鬱風霧。密雨蔽原阜。冥濛蛟龍過。隱鱗怒雷吼。傾歆臥帆席。馮翼惑前後。畏途生頃刻。顛倒亂足手。倉皇投山館。喜懼劇紛糾。攝身整衣帶。沾濕及肩肘。平生歷道路。艱險頗曾受。未能外形骸。豈敢輕衰朽。捐軀匪成仁。垂堂不宜狃。總轡登前嶺。煙雲尙昏黝。經阻有妨虞。姬文亦奔走。

早發建寧至興田驛

雞鳴戒晨裝。上馬見初日。露泫葉尙俯。霧重山未出。客途得霽景。緩步非縱佚。矧茲歲有秋。高下俱穎粟。牛羊散原野。鵝鴨滿阡陌。懷抱旣夷曠。神情自清謐。寒花蔓籬落。候蟲響蒙密。霞標青楓林。雪綻烏柏實。幽覽雖云遠。佳趣領已悉。我行固無期。況乃塵事畢。

題武夷圖

崇山奠朱維。實維羣山圍。葱蘢薄光景。隱顯變氣候。百泉縈虹蜺。萬谷蒸饌饈。深根入無底。峻表切星宿。嶒嶮削劍戟。窈窕錯錦繡。騎雲擘高掌。竇石室陰詈。金雞鳴未晨。玉女來自逗。琪樹縞玄宵。瑤花落清晝。美人遊不還。霜月怨猿狖。淒涼駕壑槎。蕪沒白玉樞。蓬萊渺滄海。弱水浩浸溜。良辰不可掩。沉思令人度。安得凌風翰。飄颻逐飛鷺。尋源挹孤清。舉林摘三秀。逍遙觀物化。俛仰空宇宙。真詮倘可求。吾將解吾綬。

孔子充相送至鵝湖

憶昨過武夷。欲往無與儔。今茲逢故人。遂得鵝湖游。輕雲翼征蓋。翔風當鳴騶。古塔插蒼藹。寺門啓平疇。陟徑旣紆鬱。馮軒亦樛流。雲旗裊香霧。金像明清秋。昔賢論道處。松柏深且幽。鴻飛渺滄海。龍去空靈湫。懷人已寂寞。對景空淹留。興闌成遠別。馬首山悠悠。

自衢州至蘭溪

秋郊歛微雨。霽色澄人心。振策率廣路。逍遙散煩襟。疎煙帶平原。薄雲去高岑。湛湛水凝碧。離離稻垂金。薺麥霜始秀。玄蟬寒更吟。幽懷耿虛寂。好景自相尋。心契清川流。目翫嘉樹林。歌傳滄浪調。曲繼白雪音。仙山在咫尺。早晚期登臨。

九日舟行至桐廬

杪秋天氣佳。九日更可喜。衆人競登山。而我獨泛水。江明野色來。風淡汲鱗起。蒼翠觀遠峰。沘寥度清泚。沙禽泛悠颺。岸竹搖羅靡。泝湍懷謝公。臨瀨思嚴子。紫萸空俗佩。黃菊漫妖蕊。落帽非我達。虛壘非我恥。扣舷月絹娟。濯足石齒齒。澄心以逍遙。坻流任行止。

從軍詩五首送高則誠南征

少小慕曾閔。窮閭兀幽棲。丘園賁嘉命。通籍廁金閨。握筆事空言。塊焉愧梁鶴。不如屬囊鞬。結束習鼓鼙。廟筭出帷幄。白日收虹蜺。劍光帖滄溟。旗尾縣鯨鯢。振旅還大藩。歌舞安旄倪。拂衣不受賞。長揖歸蒿藜。江鄉積陰氣。二月春風寒。壯士縵胡纓。伐鼓開洪瀾。長風翼萬軸。撒若橫海翰。馬銜伏轅門。翊衛森牙官。

伏鉞指天狼。怒髮衝危冠。
按節肅徒旅。神劍宵有聲。揮揮大旗動。烈烈刁斗鳴。仰看太白高。俯視滄波平。王師古無戰。蠶獮安足烹。人言從軍惡。我言從軍好。用兵非聖意。伐罪乃天討。運籌中堅內。決勝千里道。雷霆滅蛟鼉。雨露澤枯槁。懷柔首悖獨。延訪及黎老。牧羊必除狼。種穀當去草。凱歌奏大廷。天子長壽考。
清晨絕長江。日夕次海濱。北風吹旆旌。軍動速若神。令嚴戎馬閑。九陌無驚塵。伐鼓震溟嶠。揚帆役鮫人。鯨鱗京觀築。鱗醢華筵春。啾啾布穀鳴。祁祁農鴈春。去子還故鄉。悲喜集里鄰。荷鍤啓瓦礫。再荷天地仁。撫綏屬有望。世世爲堯民。

蛟谿詩

蛟乃龍之徒。隱顯異凡質。屈蟠深變環。靈變不可悉。清溪灑百湍。漱滌見冽溼。寒飆黯離晶。陰電煬幽室。超騰雲雷倏。訶禁鬼神謐。應龍翔中天。渙汗濕箕畢。大江揚濁瀾。鼉蜃恣狂譎。閉藏當有待。保養慎無失。搜奇凜精魄。跼步迷故術。崕巖生長風。林木暮蕭瑟。

題林以仁平反詩卷

木伐豈再植。壁毀寧復完。議獄有緩死。聖言垂不刊。兩造旣偏聽。無辜遘凶殘。況復使其孥。流離播夷蠻。司牧盡瞠視。佐使獨悲酸。抗詞動鬼神。潤澤生枯乾。死者縱不生。魂魄亦獲安。孤兒雖不天。且得依故山。聖人邁種德。惠及毛與翰。云胡任民寄。視之如草菅。爲君歌此曲。歌竟起長歎。

送僕世南參政分題得虎林

深林合蒙龍。仰視不見日。中有白額虎。哮吼恣狂獪。怒睛谷搖電。掉尾原簸颺。牛羊困攫取。樵牧萃憂恤。相公鎮方面。化捷影響疾。百靈肅號令。萬恠悚潛逸。昔出晝需朋。今行夜辭匹。泰山絕悲啼。牛哀返初質。豈獨惠斯邦。四海望寧謐。

題山水小畫

谿上春始還。微波動芳燠。樹暖欲生煙。山明初過雨。美人期不來。桂楫怨蘭杜。佇立忽懷愁。漁歌起洲渚。送田生歸鄉。

少年客他鄉。還鄉反如客。莫驚新井里。乃是舊阡陌。歡笑集姻親。觴酌上班白。老翁愛英俊。慰問至日夕。應憐鄰舍兒。魚龍兩縣隔。

題李伯時畫淵明歸來圖

江左昔潰亂。桓盧遞相尋。劉裕起寒微。長驅掃氛祲。秋草雖未枯。霜雪已駸駸。陶公節義士。素食豈其心。我才非管葛。誰能起淪沉。所以歌去來。歸臥五柳陰。悠悠多感激。愴恨寄謳吟。哲人貴知幾。芳名留至今。展圖三歎息。懷古一何深。

題朱孟章虞學士送別圖後

秋郊一盃酒。握手念將離。落日照野水。涼風生樹枝。今朝重相憶。青山如舊時。鬢毛非松柏。爭得不成絲。題老翁騎馬圖。

少年遠征役。及歸鬢已霜。戰甲零落盡。空餘弓箭房。老馬同死生。蹢躅沙磧長。故鄉此何極。仰看鴻鴈行。

明齋詩爲湖廣陳進士賦

客從于闐來。遺我盈尺璧。晶光射雲漢。璀璨生五色。置之暗室中。鬼魅皆辟易。願持自照身。不用持照人。

寄題江東蘭逸監司瑤芳亭

江籬悲楚佩。叢桂空秋霜。茲花特秀絕。得升君子堂。艷色非我貴。皎潔有餘光。仙人美良夜。鳴玉來琳琅。纖雲淡華月。色曠青鳳凰。飄飄白霓珮。左右參翱翔。衆卉不敢傍。瑤臺清且涼。聞有千歲實。其味如瓊漿。願持壽明主。天地同久長。

題揭伯洪山居圖

黃埃晦城市。赤日熯達道。榮華能幾何。未若山居好。啓扉對平林。闢徑入芳草。丹崖翠蘿曠。青嶂白雲抱。世事幸見遺。幽趣堪獨討。新晴景物佳。緩步隨野老。倚巖聽鳴弦。息陰憩華葆。蜂亂覺春暄。鴻驚信秋早。無榮謝馳驅。有酒任傾倒。但願長兒童。稼穡以爲寶。

會稽張氏春暉堂

喬木生山阿。碩實秋離離。誰知茂育功。乃在陽春時。丈夫佩玉玦。壯氣東西馳。列鼎未酬歡。倚門已生悲。君看斷根草。引蔓復何爲。逝波不可駐。感激成吾詩。

張子英閑止齋三首

鳥飛止茂林。魚游止深淵。步止辭踏躓。語止絕悔愆。號嶮升高壁。朽殼消腥涎。夸父逐羲和。渴死大道邊。所以知止者。不爲物所牽。擺落塵網嬰。寂寞守自然。悠悠觀羣動。默默全吾年。

閑居安所止。自古有陶公。柴門蔭高柳。左右來清風。檜籬密復疎。下有黃菊叢。摘花泛濁醪。嘯歌撫孤松。駟馬耀長衢。視之如蒿蓬。

築室在城市。而無闐闐聲。非關遠人世。慮滌境自清。圖書堆几案。花竹當簷楹。釀酒香滿甕。賓至卽共傾。黜陟吾不知。寵辱吾不驚。百歲聊復爾。孰爲身後名。

耕雲詩三首爲堵無傲作

青山何逶迤。白雲自悠悠。數畝幸可耕。此外更何求。整耨候時雨。荷鋤適東疇。凱風拂蘭蕙。林薄鳴鴈鳩。我麥旣華華。我禾亦油油。食力分所安。但願歲有秋。王租及時足。尊酒聊相酬。八月白露零。九月築場圃。稻粱已映遂。梨棗亦盈塢。耕耘幸就畢。一飽諒可取。斗酒烹黃雞。殷勤會田父。但願守令賢。邑里得按堵。無事苟安居。明朝復相聚。

朝耕原上雲。暮宿雲間屋。雲來動丹霄。雲去澄翠麓。坐看雲變化。臥見雲起伏。斯須不可期。飄忽鳥過目。濯足臨寒泉。息景蔭嘉木。飯蔬勿云惡。無憂勝梁肉。長歌招隱詩。清風滿空谷。

壬辰歲八月自台州之永嘉度蒼嶺

昨暮辭赤城。今朝度蒼嶺。山峻路屈盤。峽束迷暑景。筓屨出風門。坎窞入天井。冥行九地底。高闕羣木頂。瀑泉流其中。飈若洩溟滓。哀猿嘯無外。去鳥飛更永。僕夫怨跋涉。瘦馬悲項領。盜賊追天誅。平人遭灾眚。佇立盼嶽岑。心亂難爲整。

夢草堂遺懷

卽事在自得。彊歌非正音。所以春草句。聲價重兼金。若人千載下。遺響邈難尋。淒涼一池塘。賴爾得至今。我來當杪秋。天淨潢潦沈。枯荷有餘馨。衰柳無殘陰。鼓鼙響未已。山水意徒深。感時念兄弟。惻愴傷我心。

在永嘉作

高屋集飛雨。蕭條生早寒。我來復幾時。明月缺已團。浮雲蔽青天。山川杳漫漫。狐狸嘯悲風。鯨鯢噴重瀾。孤鴈號南飛。音聲悽以酸。顧瞻望桑梓。慷慨起長歎。願欲凌風翔。惜哉無羽翰。中夜百感生。展轉不遑安。枯荷響西池。稿葉鳴林端。寥寥天宇空。冉冉時節闌。舉俗愛文身。誰識章甫冠。河流未到海。平陸皆驚湍。旗幟滿山澤。嗚呼行路難。

蟾室詩爲台州棲霞觀道士作

蟾是蝦蟇精。誰令居月宮。淒其羈旅身。竟作蝕月蟲。我心有靈丹。光與日月同。子能精鍊之。可發天地矇。照灼六合外。安事一室中。哀哉爬沙輩。局促棲樊籠。

癸巳正月在杭州作

春陽動萬物。衆草皆已抽。嚶鳴亦和悅。我何獨懷憂。鯨鯢未蘗醢。豺狼滿山丘。鳳凰竄荆棘。烏鳶自相求。浮雲蔽蒼穹。天路阻且脩。風沙日暮起。鑿羽安所投。悲來怛中懷。泣涕縱橫流。江城陰氣凝。積雨春淒涼。出門何所見。但見瓦礫場。新廬各有前。店舍亦已張。市人半荷戈。使客盡戎裝。回首舊遊地。慘淡寒煙黃。悵焉念所思。惻愴心中傷。徘徊西湖上。愴愴有所思。所思不可見。涕淚下沾衣。死生一瞬息。逝者安可追。狼躑信君子。李陵非男兒。

鍛鐵當用椎。析薪當用斧。拔蓼而植茶。去辛還得苦。峨峨九陽門。衛以豹與虎。微微螻蟻忱。鬱鬱不得吐。

登臥龍山寫懷二十八韻

暮春時雨餘。原野皆秀色。流雲矚芳甸。惠風暢輕翼。公崇岡低垂。崇岡緬登陟。山川糾紛錯。疆畝互紆直。淒涼神禹穴。偃仄句踐國。玉簡闕玄緘。銅牛啓雄德。霸氣浩江河。王風散荆棘。感今情軫鬱。懷古心愴惻。東溟尙波濤。中原未耕織。無能事蕭曹。妄意追契稷。蹇產魂屢遷。逶遲足猶側。良辰復幾何。白日忽中昃。周流睨圓方。俯仰觀動植。有水必趨東。無星不拱北。宗社固神靈。至尊實恭默。殷王伐鬼方。尙期三年克。苗頑負險阻。終竟膺竄殛。天戈向無前。況乃誅鬼蜮。竊聞海濱民。決背疾狂慝。荷戈思一奮。所懼官未識。朝廷鑒往轍。中道誅貪悞。主將敦書詩。志士願盡力。諸公總英俊。矯矯百夫特。愚生諒踈拙。千慮冀一得。農人奉壺漿。遲爾殄蝥賊。采薇戒懷歸。伐檀慙素食。白雲在青天。可望不可卽。浩歌梁甫吟。憂來憑胸臆。

立夏日有感

朝旦天宇清。逍遙步庭除。溫風自遠至。綠樹嘉有餘。登高展遐眺。萬象各以舒。念此客行久。感彼時節徂。退食恥尸素。進思愧庸鶯。仰視日月高。俯察川原紆。願欲凌風翔。周流觀六虛。天路脩且阻。惜無奇肱車。倚松翫懸蘿。藉茅想連茹。公叔實尙賢。寧武不能愚。何當脫塵鞅。歸臥園田居。

贈柯遂卿一首并序

今年夏四月。余至台。聞柯遂卿抗言釋誣囚事。甚異而偉之。夫天下之大。豈無慷慨激烈之士。見義而勇爲之者哉。其作也。非有私。其進也。非有求。觸于其心。形于其言。發于其事。信于其事。可不謂之大丈。

夫哉。惜其晦而弗彰也。於是乎爲之詩曰。

雷霆蟄神威。妖蜃躍海濱。將軍戰敗死。玉帳空無人。腥涎之所被。蛭蠃皆蛇鱗。天弧不張弦。民情曷由申。縣講亦令典。奉行在明仁。誰令姦宄徒。並緣逞頑嚚。俄然齒髮軀。化作豺狼身。剽金旣無畏。況復枉平民。壯哉柯夫子。義氣衝九旻。曳裾公府門。抗論回星辰。坐令霜雪間。朽骨生陽春。睨視夸毗兒。精魂散飛塵。我忽耳聞之。肝膽張輪囷。安得似卿輩。落落千百人。出應休明時。翊贊臯陶臣。旌別鸞與梟。再使權衡均。上天意茫茫。感歎空悲辛。

贈周宗道六十四韻

天弓撥其弦。平地躍虎狼。腥風扇九澤。濁霧干太陽。瑣瑣蚊與蟲。亦沸如蝸蟻。帝閣隔蓬萊。弱水不可航。螻蟻有微忱。抑塞無由揚。遙遙草茅臣。怒切忠憤腸。披衣款軍門。披腹陳否臧。曰走居海隅。詩書傳世芳。感荷帝王恩。祿食廁朝行。走身非已軀。安得緘其吭。走有目擊事。敢布之廟堂。永嘉浙名郡。有州曰平陽。面海負山林。實維甌閩疆。閩寇不到甌。倚茲爲保障。官司職防虞。當念懷善良。用民作手足。愛撫勿害傷。所以獲衆心。卽此是仞墻。奈何縱毒淫。反肆其貪攘。破廩取菽粟。夷垣劫牛羊。朝出繫空橐。暮歸荷豐囊。丁男跳上山。妻女不得將。稍或違所求。便以賊見戕。負屈無處訴。哀號動穹蒼。斬木爲戈矛。染紅作巾裳。鳴鑼撼巖谷。聚衆守村鄉。官司大驚怕。棄鼓撤旗鎗。竄伏草莽間。股慄面玄黃。窺伺不見人。湍江走倭倭。可中得火伴。約束歸營場。順途劫寡弱。又各夸身彊。將吏悉有獻。歡喜賜酒觴。殺賊不計數。縱橫書薦章。民情大不甘。怨氣結腎腸。遂令父子恩。化作蠱與蝗。恨不斬官頭。剔骨取肉嘗。壘壘野田中。拜泣禱天皇。

願得賢宰相。飛牋奏巖廊。先封尙方劍。按法誅姦賊。擇用忠蓋臣。俾之提紀綱。彎弧落鷗鳥。薤棘出鳳凰。尙可存子遺。耕稼納官倉。失今不早計。如水決隄防。而後事堙築。勞費何可當。足間疽初生。灼艾最爲良。厥成施剗割。所憂動膏肓。邊戎大重寄。得人則金湯。龔遂到渤海。盜賊還農桑。張綱入廣陵。健兒跪如羊。苟能任仁智。勿使儉邪妨。孟門雖險艱。可使成康莊。走非慕爵賞。自嚮求薦揚。痛惜休明時。消患無其方。又不忍鄉里。鞠爲狐兔場。陳詞未及終。涕泣下滂滂。旁觀髮上指。側聽心中傷。天路阻且脩。不得羽翼翔。可憐涸轍魚。待汲西江長。況有蛟與蛇。磨牙塞川梁。施丘靡與同。載馳徒慨慷。嚴冬積玄陰。天色慘以涼。衆鳥各自飛。孤鸞獨徬徨。冥冥麗山雲。木葉殷清霜。子去慎所適。我亦行歸藏。

遣懷

鴻鵠會高風。拂翼凌雲霓。蛟龍不得水。菴鱗困塗泥。惟昔望諸君。一戰舉彊齊。秦穆伯西戎。能用百里奚。傳說築商巖。太公釣磻溪。韓信寄食飲。孔明躬耕犁。立賢苟無方。曷問鷺與鷺。驅車上太行。峻極不可躋。重雲蔽層岑。流潦絕荒蹊。豺狼當我嗥。魍魅向我啼。顧瞻望九州。欲去惑東西。嘉穀委蔓草。良田養蒿藜。乘黃避跛鼈。狐貉驕虎貔。誰言縱壑魚。竟爲觸藩羝。長夜起嘯嘆。邪氣憑我臍。夢登舜蒼梧。遙望禹會稽。援琴奏將歸。日暮增慘悽。盲颯正滌勃。孤鳳將安棲。

三月八日偕徐成中楊澄源李子庚吳溥泉董朝宗黃中立程邦民湯仲謀王文明遊南鎮得

禽字

積雨露芳甸。凱風來遠林。逍遙出郊郭。徙倚散煩襟。桂棹蕩清漣。長裾曳輕陰。肆覽夏王陵。流觀秦帝岑。

黃熊安所之。荒楚自蕭森。仰翫卉木榮。俯聆泉石音。洋洋潭底魚。啾啾枝上禽。昭融見天德。澗澗怡人心。況有文彥友。溫恭比瑤琳。獻酬禮不愆。詠歌思彌深。良辰豈易得。嘉會難屢尋。願作膠與漆。無爲商與參。殷勤屬此章。冀以代兼金。

送馬生遊京師

東山夜雨急。鑑湖春水深。之子遠于邁。祖帳清江潯。白日映蘭皋。青煙起松岑。豔舞激回風。長歌裊哀音。何以慰離懷。八珍盈釜鬻。何以將素情。贈言比瑤琳。京畿佳麗地。多士紛如林。構厦僭檀栳。去疾須苓參。殷勤治安策。悃款大寶箴。敷陳草茅情。啓迪帝王心。斯人邈永矣。繼之在于今。勿羨蘇季子。自侈多黃金。

別峯和尚方丈題唐子華山陰圖

連山走陂陀。太谷入隆曠。屋藏深樹中。路出巨石背。煙雨時有無。澗谷互顯晦。輕盈曳飛綃。縹緲沃浮黛。雄梁矯脩鬣。辟壁駁文璫。崢嶸紫霞高。屈曲白水匯。陰森神鬼宅。奮迅龍馬隊。風雲氣象寬。日月光烟碎。借問此何鄉。或有捐余佩。答云越山陰。信美無與對。自從永和來。燕遊推勝槩。佳人去不還。盛集嗟未再。唐令實好奇。掇拾歸畫繪。上人遠公徒。我亦淵明輩。會晤屬時艱。觀覽增感慨。故園沒灌莽。舉足蛇豕礙。放歌自太息。激烈驚厚載。

送孔世川赴江西儒學提舉

鏡湖荷花發。耶溪菱葉生。送君何所之。去作西江行。西江大藩地。卓犖多豪英。文能絢雲漢。武能壯干城。浩蕩吳楚間。頽波障東傾。鳳凰不妄集。梧桐匪空榮。行行勿憚遠。亶亶崇令名。

我辭西江歸。倏忽十二秋。每望西江雲。思心悵悠悠。恨無排風翼。安能凌虛游。故人渺天末。可夢不可求。邂逅送子行。感我涕泗流。登山有脩蛇。涉水有長虬。逝者如零雨。一落誰能收。

爲竺西和尚題谿山茅屋圖

青山十畝餘。茅屋數間足。高樹結浮煙。脩篁茂深綠。孤松無鄰舍。生理不拘束。開田種禾稻。間以黍與粟。中歲幸西成。青黃被谿曲。鳧鷖與鴻鴈。亦各得所欲。清秋霽涼雨。礪底石如玉。野老時見過。杯酒聊與屬。但願官長廉。吏卒莫我毒。耕稼納王租。世世還相續。

春谷詩爲竺西和尚賦

條風自東來。雪消春谷暖。荒畦碧草短。清池細泉緩。谿花明錦繡。時禽響弦筦。道人閑無事。習慣牛頭嬾。過橋禪杖落。坐石架裘袒。日暮精舍歸。燈龕白雲滿。

四月二十二日郊外游得水字

草根螻蟻鳴。湖上蕪葭靡。繁林孀深綠。清池散圓紫。離居昧節序。陶情賴佳士。泛舟出郊甸。緩涉信所履。壺觴展倡酬。及此晴日美。嘯歌望山川。慷慨集悲喜。豺狼未鼎鑊。郊野尙多壘。鐵衣掛儒冠。好爵建麻屣。吾儕幸味苦。得似道傍李。無思身外憂。適意聊復爾。歸雲入禹穴。返照射宛委。烏啼樹有風。帆過煙生水。興盡各言還。月明城角起。

題枯木圖

松以直而伐。桂以芳而攻。睠此屈曲形。擁腫又空中。身爲螻蟻家。根作螻蟻宮。蠹皮化土壤。朽腐不可烘。

輪困盤石間。幾歲經霜風。明堂構羣材。梯梁匝鏗鏘。斧斤獨不到。凋落還芃芃。知兵贖孫子。善射殲有窮。胥種伏短劍。韓彭歎良弓。豈如蚩蚩氓。負薪鬻蒿蓬。飢食渴則飲。不識王與公。白髮死枕席。無事傷其躬。贈詩持畫還。去尋黃綺翁。

五月三日會王氏南樓得激字

蹇步屬時艱。睽違苦多感。偶寄越城隅。頗喜得幽寂。炎夏天象明。羣山皎如滌。況有文獻友。同心不離迹。雖無鼎俎盛。斗酒聊相覓。登樓望禹穴。慷慨生感激。玄珠淪赤水。金簡不可覲。崩騰六合內。慘淡多羽檄。天弧弛虛殼。封豕逃礎鎖。惟見野田中。白骨雜瓦礫。憂來歌一曲。客淚再三滴。晚風吹晴霞。海色映石壁。展詩肆遐眺。嚴令困勅敵。諸公俱鳳麟。愧我獨樗櫟。危途知驥驥。勉旃樹功績。無然學兒女。愴恨山陽笛。

題西旅獻葵圖

鳴鳳啓至德。鎬京作王家。萬國戴元后。懷柔無邇遐。逝矣裔夷人。占風慕中華。毳服耳金鑷。拳毛眼窈窪。獻葵越重譯。辛苦涉流沙。歸仁自彼心。務廣匪予夸。睿睿大廷臣。忠告猶咨嗟。卜年盈八百。分得未爲奢。云胡叔世主。黷武生誼嘩。枸醬毒南徼。河源詫西槎。哀哀萬夫命。驅以易驪騮。暴蔑文祖訓。大貽天下瑕。畫圖漫寫形。索意良無涯。太康焚雉頭。宮闈苗妖芽。開元灰組繡。驪岫荒淫哇。夫豈不有初。蕩心生百邪。望美洛陽都。赤符炳流霞。玉關閉高門。軍賓絕相加。鳩杖老貔貅。虎落藹桑麻。煌煌中興業。奕奕流芳葩。謙光信受益。知足復何差。感事重懷古。因書戒矜誇。

題錢舜舉折枝山茶

歲暮寒氣結。百卉無遺榮。懿此獨不凋。方冬燁紅英。有似節義士。特立不爽貞。幽居屏紛雜。丹鉛寄深情。葱蘢翠雲翹。綴以流霞精。玄霜避晨豔。華月助宵明。坐令桃與李。無言愧微生。贈詩勿遐棄。貴之比瑤瓊。

遣興六首

避地適他鄉。息肩謝羈束。生事未有涯。暫止聊自足。南園實清曠。可以永幽獨。層樓面羣山。俯見湖水綠。雜英被郊甸。魚鳥得棲宿。登臨且慰意。未暇計遠躅。聖賢有遺訓。知命夫何辱。

積雨兼數旬。天氣涼有餘。青苔交戶庭。始覺人跡疎。地主多閑園。可以種我蔬。兒童四五人。蔓草相與鋤。既倦則歸休。臥闕床上書。無事且爲樂。何者爲名譽。

夏日苦太長。夜景良可愛。華月吐曾岑。遙天碧如黛。披衣更登樓。稽山正相對。澄湖晶空明。浮雲去無礙。遺榮世何人。賀老今不在。涼風吹毛髮。坐久增感慨。

溽暑百體倦。曉涼正堪眠。飛蚊何營營。繞鬢鳴相煎。拍之不勝多。揮去還復前。世亂有骨肉。逃生幸完全。細微何足較。此意誰當傳。

綠樹何陰陰。良苗亦離離。開窗招遠風。赤鯉躍清池。雲日釀晴光。芰荷有餘姿。宴坐偶自得。悠然遂忘飢。富貴不可求。守分勿復疑。

迂疎乏世用。矯情非所安。投簪謝時輩。聊得心中寬。回首望故鄉。枳棘日以繁。譬彼水上萍。隨流且盤桓。樓頭好山色。晴雨皆可觀。未知明朝事。且盡今日歡。

久雨壞墻園蔬盡壓悵然成詩

晚歲逼豺狼。漂搖去鄉土。囊囊罄留儲。釜甑恆若窳。開畦種蔬菜。撥借荷地主。晨興率童稚。樹藝躬僂僂。瓠實正纒離。茄花亦爭吐。魚肉方絕交。恃此當醢脯。悲風吹江干。浩蕩十日雨。幽泉湧陰竇。高塘坼脩堵。蒼蔓壓泥沙。朱苞埋宿莽。淒涼紫芝英。乃與朝菌腐。數奇值時危。一飽不敢取。天地有窮愁。每望貧家聚。青苔滿頽墻。日暮空倚柱。

題鮮于伯機書杜工部詩後

少陵昔避亂。買屋西枝村。卜鄰得贊公。聊可與晤言。四郊鬪豺虎。煙塵塞乾坤。中宵望北辰。慘戚衰老魂。我今亦漂泊。不得歸本根。感此一太息。欲語聲復吞。

次韻和脫因宗道感興三首

索居守貞素。久已忘世機。晨興夕還寐。不知時節違。庭前有芳樹。宿昔容顏非。巢鳥去安之。寒蟬鳴亦稀。居人歌北風。客子歎無衣。浮雲結陰翳。白日少光輝。鴻鴈號南翔。蟋蟀在中闈。榮華如流水。一往何當歸。松栢守孤直。不爭桃李色。明星在青天。有時化爲石。春風車馬塵。竟日翳紫陌。寧知禾黍地。舊是王侯宅。蓬萊有仙藥。求之不可得。霜風吹林木。歲暮徒愴惻。鋌刀方用世。掛壁干將閒。剪松養荆棘。匠石空悲酸。驅車陟大行。日暮多險艱。玄冰膠大谷。脫粟貴琅玕。魍魎攬人魂。豺狼食人肝。路遠無羽翼。何由得飛還。

題春江送別圖

春江水悠悠。行人上蘭舟。春雲散江樹。行人重回顧。嘉會未有期。離心渺千里。願作還山雲。莫作東流水。

琴清堂詩

亭亭曝陽桐。斲爲綠綺琴。絙之朱絲絃。彈我白雪音。虛堂夜迢迢。華月耿疎林。鳳凰天上來。虬龍水中吟。曲罷起太息。無人知此心。

田家

田家無所求。所求在衣食。丈夫事耕稼。婦女攻紡績。侵晨荷鋤出。暮夜不遑息。飽暖匪天降。賴爾筋與力。租稅所從來。官府宜愛惜。如何恣刻剝。滲漉盡涓滴。怪當休明時。狼藉多盜賊。豈無仁義子。可以弭鋒鏑。安得廉循吏。與國共欣感。清心罷苞苴。養民瘳國脈。

渡江遣懷

東風吹滄江。白日照花柳。山川半顯晦。積雨晴未久。青陽好氣候。羣物競苞剖。農夫荷鋤犁。各自登隴畝。鴈鳩鳴相應。陂水光瀏瀏。天地起戈兵。荆榛塞原阜。茲邦特按堵。庶足憩奔走。故鄉有園田。委棄沒藜莠。老母年八十。頭童齒牙朽。癡兒始垂髫。出入寡朋友。衣衾雜絮纛。羹食乏菘菲。儼然多病身。全家倚糊口。那令更遠去。憂念成疾首。千金聘宿瘤。顧謂西施醜。鹽車摧太行。驂騑不如狗。況我鴛鴦質。困踣畏培塿。濟河須巨舫。將焉用罌缶。朱弦絙琴瑟。曷中洪鐘紐。剡蒿射犀革。空貽養由咎。巍巍神祖烈。乾坤讓高厚。蠢茲蛇豕儔。乘間恣哮吼。非無熊羆臣。土產分左右。更張吾豈能。習慣彼已狃。鹿麋曾傷虎。宵邁讐狸鼠。寤言亂心緒。忽若醉醇酒。疎賤等蚍蜉。捐軀復何有。夷吾匪每生。鞠育未宜負。愴恨憶松楸。淚濕蓬鬢垢。道途正難阻。進退維窳白。向風一陳情。何由達南斗。

題山水圖

江上何所有。高低千萬峰。結廬覆以茅。取足聊自容。綠樹旣蒼鬱。清溪亦溶溶。地僻無車馬。猿鳥得相從。日落沙際明。寒煙澹疎松。蒼茫雲霞外。隱見青芙蓉。悠然一舸還。好景時獨逢。歸來山月出。古刹鳴昏鐘。

若耶溪。杏郭深居精舍。

上人好山居。入山惟恐淺。紆餘涉淵沚。結構依巖嶮。岡巒外挺拔。水木終隱顯。其前對鵝鼻。突兀正冠冕。其傍連木禾。積翠森偃蹇。後有獅子巖。巒嶺露巖巖。春花炫陽林。秋草馥陰巖。高通雲雨過。側見星斗轉。桃源不遠求。箕穎安足踐。我來三伏涼。羈懷忽如展。談經道心融。聽灑俗慮翦。踈窗夜深啓。孤月掛遙峴。空濛白毫光。閃爍動嵯岼。何當此卜隣。永用辭澆灑。

大熱遣懷

盛夏火用事。長日不可堪。熱汗發我膚。如泉溢穹窿。清晨登樓望。四野皆紅嵐。坡垞會稽山。縹緲浮鬱藍。何由作雨澤。一洗喝與酣。須臾玻璃潭。湧出琉璃潭。雜氣若絳旂。飄颻散空岾。朱光蕪九幽。天色熯以醜。樹木首咸俯。鳥獸聲盡錮。玄冥將禺彊。側身入壑龕。淵蛇葺短鱗。山龜灼枯臙。悍熊伏朝飢。困龍縮秋蠶。焦根裂埴斷。斃鷓蚌脯含。水井爲湯池。冶容成病頰。渡水翅帖帖。守門口訕訕。蝸蟾輕綃翼。依陰萃楓柟。沸渭泊靜寂。噪聒亂語談。蒼蠅丹砂頭。羣飛逐烹脂。拍之適汚手。驅之死仍耽。對食憚下脘。引飲輒傾甌。撫几炎欲燎。披衣重猶函。慨彼征戍卒。荷戟忘寢寢。棄絕骨肉愛。不得同苦甘。但聞盜賊熾。未見工師戡。郊原虜掠遍。餽餉那能覃。況乃隆暑節。蒸鬱非所諳。用兵貴拙速。將帥當懷慙。沈冥及暮鼓。兩目脂流泔。

拂袖招遠風。衆星爛天南。河漢上昭回。煙霞遠盪盪。且喜辰極明。願覩戎馬倏。雲門連鏡湖。林壑清且涵。豈惟隔埃壘。庶足憩負擔。惜無五畝宅。偃蹇投吾簪。

六月十八日自天章入城作

天淨山氣涼。溪渾夜來雨。籃輿度疎翠。初日照平楚。高林半長煙。好鳥時自語。煩襟得蕭散。似欲忘羈旅。何當盜賊息。比屋豐禾黍。逍遙丘壑間。麋麋以爲伍。

晚同方舟上人登師子巖作

落日下前峰。輕煙生遠林。雲霞媚餘姿。松栢澹清陰。振策縱幽步。披榛陟層岑。槿花籬上明。莎雞叢間吟。涼風自西來。颼颼吹我襟。榮華能幾時。搖落方自今。逝川無停波。急弦有哀音。顧瞻望四方。悵焉愁思深。

七月四日自深谷之靈峰作

平旦出雲門。亭午至靈峰。山盤澗縈紆。谷深巖錯重。竹露滴皎皎。林霞散溶溶。度石苔蘚滑。披蘿煙靄濃。頗喜禾黍成。可以慰老農。野草各有花。照水似銜容。徐行恐觸熱。聊憩唾下松。時聞幽鳥鳴。亦足開心胸。慨懷陶隱居。丹竈今無蹤。干將與莫邪。俱已化爲龍。空餘遠山色。茵蔯青芙蓉。

清脩院良上人浸月軒

華池浸皓月。高下共清瑩。爛如長明燈。飛入大圓鏡。又疑鉛汞爐。伏火發宵映。層軒開九秋。萬象出昏暝。月來池色動。月去池色定。窺臨足遊適。翫味見心性。珍重無生侶。於焉託清淨。宴坐六塵空。百魔從律令。

普濟寺用恭行已上人韻

偶從靈峰來。遂作雙峰遊。雙峰何峨峨。俯映耶溪流。炎天正埃鬱。欲往安所投。喜見農事成。秔稻滿中丘。步入古寺門。信美無與儔。綠池對徑路。水木自深幽。飛蘿冒松柏。上有猿與猴。登樓散煩熱。坐挹山綢繆。更愛山下泉。冷冷洩陰溝。青苔闕脩竹。竟日涼風留。披軒眺西崖。煥若丹霞浮。神劍去安之。起望空斗牛。沉思終永夜。月白銀潢秋。

題陸放翁晚興詩後

雄劍闕寶匣。中夜蛟龍吼。男兒抱志氣。寧肯甘衰朽。松栢在深谷。枝葉拂星斗。雖無般匠顧。勢自凌培塿。昂昂商山翁。矯矯渭濱叟。林泉不遐遺。軒冕亦固有。奈何劉伶輩。賤身若芻狗。徒生天地間。辜負髮與手。三復詠斯章。千載吾尙友。

題商學士寒林圖

昔聞商學士。水墨稱絕藝。今觀寒林圖。信美無與儷。淒涼霰雪餘。箴掃悉輕脆。玄水刮老骨。衣被荷纖荔。龍鬚結瓔珞。虎爪出鋒銳。鱗皴輟蛇殼。璀璨琅玕蒂。下有不死石。藍汁沃鬢髻。前有赴海湍。漱濯沙土細。青煙曼遙渚。白日淡荒裔。蒼茫浮雲外。縹緲惑盼昧。梧桐早飄落。鳳鳥將焉逝。四序若循環。歲蕤在樞翳。衰榮各有時。至道惟冥契。

題雜畫卷子

山川出雲霓。谿谷藏虎豹。枯樹繪綾身。恠石魄疊貌。竹枝如琅玕。煙雨昏暮罩。梅花雪中開。的礫珠磊皔。蘭獨稱國香。嬌麗最可樂。萋纖草堪籍。傷覃棘能抓。宋公學元暉。駭獸見騰颯。老班性嗜酒。藻思發餘醇。

丹丘泣龍髯。零落江湖權。顛王食敗筆。得米動盈窰。僧明本靜者。一藝起衆鬧。展卷見歷歷。聊足鮮喧噓。裁詩慕韓豪。瑣細非所較。

題宋子章效米元暉山水圖

昔時米南宮。父子同畫癖。油然煙雨態。千里入盈尺。近代宋尙書。筆意妙欲逼。置之几格間。新舊莫辨識。應是前後身。神會造化迹。鴻濛迷日月。瀕洞飛霹靂。蒼崕晦中斷。天闕杳高隔。洪濤漲無倪。龍虎移窟宅。農夫怨昏墊。樵牧絕行跡。破屋兩三家。搖撼已傾側。得非杜少陵。無乃陶彭澤。簷茅委泥寧。籬菊沒狼籍。空江乏舟楫。汗漫安所適。披圖瞻青冥。惆悵至終夕。

爲賈性之賦松石

老松不構廈。潛跡歸后土。千年化爲石。詭怪驚地府。艷都壯輪奐。翦截就梁柱。嶙峋鋸鑿餘。棄置人得取。君家赤玻璃。光采奪朝暉。嶒嶸鐵心堅。璀璨霞色古。何當呼吳罌。匠以脩月斧。持獻女禍皇。天罅或可補。有客來款我。

有客來款我。自謂儒者儔。問我胡不出。乃來此淹留。我笑而不答。彼問方未休。彼我異所志。問答寧相投。青山屋外高。溝水山下流。隱几書一卷。寒簷雀啾啾。

題趙文敏公畫松

吳興昔王孫。能畫世莫及。觀其二松圖。矯若龍出塾。蟠根破坤輿。拔萃滄原隰。交加各軒翥。崱屺相倚立。鬣鱗撐空青。豕鬣振颯飈。高藏日月氣。清滴雲霧汁。垂釣者何人。短棹非妄集。五湖多風濤。蛟蜃頭角聳。

不如滂澤間。取足鱣與鱒。倦眠松影下。百竅清涼入。慎勿驚松枝。天寒衣袂濕。

題三香圖

梅是玉堂花。和羹有佳實。水仙如淑女。婉婉抱貞質。山礬直而勁。野處似隱逸。分類族雖三。論德性乃一。瓊臺耿清夜。涼月白勝日。霏霏芳氣交。粲粲華采溢。琪樹讓晶瑩。瑤草愧私暱。願言永其歡。歲莫保終吉。

感時述事十首

天王有萬國。撫治不能徧。百僚分所司。控制倚方面。旬宣貴浹洽。付託屬隆眷。易置苟無恆。勤怠朝夕變。自非曷氏儔。何官匪郵傳。矧茲世多故。軍府希閒宴。戎機一以失。蟻穴債臺殿。公庭委舊事。書牘呈新選。來者且遲遲。在者同秋燕。偷安待日至。退託從私便。姦貪遂乘隙。民病孰與唁。大臣國柱石。憂喜相連纏。反躬既遺闕。何以率州縣。寄與要津人。有舌未宜燕。十羊煩九牧。自古貽笑嗤。任賢苟不貳。焉用多人爲。師行仰供給。州縣方告疲。差徭逮所歷。添官有權宜。奈何乘此勢。爭先植其私。百司並效尤。貨賄縱橫飛。列坐隘公堂。號令紛披離。名稱到輿隸。混雜無尊卑。正官反差出。道路不停馳。徇祿積日月。官吏之所希。此輩欲何求。朘剝圖身肥。世皇一宇宙。四海均惠慈。盜賊乘間發。咎實由官司。云胡未悔禍。救焚用膏脂。姻婭遂連茹。公介棄草茨。農郊日增壘。良民死無期。天關深虎豹。欲語當因誰。先王制民產。曷分兵與農。三時事耕稼。閱武在嚴冬。亂略齊憤疾。戰伐厥有庸。那令異編籍。自使殊心胸。坐食不知恩。怙勢含威兇。將官用世襲。生長值時雍。豈惟昧韜略。且不習擊剗。悍卒等驕子。有令亦無從。

跳躩恣豪橫。鼓氣陵愚憊。所以喪紀律。安能當賊鋒。崩騰去部曲。蟻合尋歸蹤。時方務姑息。枉法稱寬容。寧知養豺虎。反噬中自鍾。國家立制度。特此爲垣墉。積弊有根源。終成腸肺癰。何由復古道。一視均堯封。象狗不噬禦。星馳募民兵。民兵盡烏合。何以壯干城。百姓雖云庶。教養素無行。譬彼原上草。自死還自生。安知狗大義。捐命爲父兄。利財來應召。早懷逃竄情。出門卽剽掠。所過沸如羹。總戎無節制。顛倒迷章程。威權付便嬖。賞罰昧公平。饑寒莫與恤。銳挫怨乃萌。見賊不須多。奔潰土瓦傾。旌旗委曲野。鳥雀噪空營。將軍與左右。相顧目但瞠。此事已習慣。智巧莫能爭。廟堂忽遠筭。胸次猜疑并。豈乏計策士。用之非至誠。德威兩不立。何以御羣氓。慷慨思古人。惻愴淚沾纓。

古人有戰伐。誅暴以安民。今人尙殺戮。無問豹與麟。濫官舞國法。致亂有其因。何爲昧自反。一體含怒瞋。斬艾若草芥。虜掠無涯津。況乃多橫斂。殃禍動輒臻。人情各畏死。誰能坐捐身。所以生念慮。嘯聚依荆榛。暴寡憚強梁。官政惟因循。將帥各有心。邈若越與秦。遷延相顧望。退託文移頻。坐食挫戎機。養虺交蛇鱗。遂令耕桑子。盡化爲頑嚚。大權付非類。重以貽笑顰。鼠璞方取貴。和璧非所珍。但恐胥及溺。是用懷悲辛。五谿舊三苗。蛇蚓相雜處。其人近禽獸。巢穴依險阻。起居任情欲。鬪狠競爪距。況能識君臣。且不顧子父。所以稱爲凶。分北勞舜禹。先朝慎羈縻。罔俾來中土。胡爲倏而至。馳驟如風雨。見賊但趨起。逢民輒俘虜。腰纏皆金銀。衣被俱繡組。所過惡少年。改服投其伍。農家劫掠盡。何人種禾黍。盜賊有根源。厥咎由官府。任將匪能賢。敗衄乃自取。奇材何代無。推誠卽心膂。誰哉倡此計。延寇入堂宇。割鼻救眼睛。於身竟奚補。浙西耕桑地。百載安生聚。自從甲兵興。徵斂空軸杼。疲氓真可憐。忍令飼豺虎。追憶至元年。憂來傷肺腑。

虞刑論小故。夏誓殄渠魁。好生雖大德。縱惡非聖裁。官吏逞貪婪。樹怨結禍胎。法當究其源。剪鋤去根荄。蒙龍曲全宥。駕患於後來。濫觴不壅塞。滔天谷陵頽。總戎用高官。沐猴戴母頤。玉帳飫酒肉。士卒食菜羹。未戰已離心。望風遂崩摧。招安乃倡議。和者聲如雷。天高豹關遠。日月照不該。俱曰賊有神。討之則蒙災。大臣恐及已。相視若銜枚。阿諛就姑息。華綏被死灰。姦宄爭效尤。無風自揚埃。嘯聚逞強力。謂是爵祿媒。黎民亦何辜。骨肉散草萊。傾家事守禦。反以結嫌猜。慟哭浮雲黑。悲風爲徘徊。赤子母不憐。不如絕其脛。養梟逐鳳凰。此事天所哀。胡爲尙靡定。顛倒腥與頰。春秋戒肆眚。念此良悠哉。八政首食貨。錢幣通有無。國朝幣用楮。流行比金珠。至今垂百年。轉布彌寰區。此物豈足貴。實由威令敷。廟堂喜新政。躁議違老夫。悠悠祖宗訓。變之在朝晡。瞿然駭羣目。疑恠仍挪揄。至寶惟艱得。韞櫝斯藏諸。假令多若土。賤棄復誰沽。錢幣相比較。好醜天然殊。譬彼絺與綌。長短價相如。互市從所取。孰肯要其物。此理實易解。無用論智愚。矧茲四海內。五載橫戈戍。赤子投枳棘。不知所歸途。一口當萬喙。唇縮舌亦瘞。導水必尋源。源達流乃疏。藝木必培根。根固葉不枯。慎勿庸邇言。揚火自焚驅。尙克詰戎兵。丕顯厥祖謨。惟民食爲命。王政之所先。海嶼實天物。厥利何可專。貪臣務聚財。張羅密於甑。厲禁及魚蝦。鹵水不得煎。出門卽陷阱。舉足遭纏牽。焦然用鞭箠。冤痛聲相連。高牙開怨府。積貨重姦權。分攤筭戶口。滲漉盡微涓。官征勢旣迫。私販理則然。遂令無賴兒。睚眦操戈鋌。出沒山谷裏。陸梁江海邊。橫行荷篋籠。方駕列船舩。拒捕斥後懦。爭彊夸直前。盜賊由此起。狼藉成蔓延。先王務廣德。如川出深淵。外本而內末。民俗隨之遷。自從甲兵興。奄忽五六年。借籌討得喪。耗費倍萬千。回憶至元初。禁網踈且平。家家有衣食。畏刑思保全。

後來法轉細。百體皆拘攣。厚利入私家。官府任其愆。大哉乃祖訓。典章尙流傳。有舉斯可復。庶用康迤邐。秦皇縣九宇。三代法乃變。漢祖都咸陽。一統制荒甸。英雄旣鏖削。瘡痍獲休宴。文皇繼鴻業。垂拱未央殿。累歲減田租。頻年賜縑絹。太倉積陳紅。圓府朽貫線。是時江南粟。未盡輸赤縣。方今貢賦區。兩際日月竄。胡爲倚東吳。轉餉給豐饑。徑危昌不測。勢與蛟龍戰。遂令鯨與鯢。掉尾乘利便。扼腕要國寵。金紫被下賤。忠良怒切齒。姦宄競攀援。包羞屈政典。尾大不可轉。聖人別九州。田賦揚爲殿。中原一何曠。所務非所先。豳風重稼穡。王業丘山奠。夫征厲末習。孰敢事游燕。哀哉罔稽古。生齒徒蕃羨。一耕而十食。何以奉征繕。長歌寄愁思。涕淚如流霰。

丙申二月別紹興諸公

勞生屬時艱。將老萃憂戚。風塵隘九野。何士爲樂國。茲邦控吳越。名勝聞自昔。湖山競奇麗。物產亦充斥。交遊尙質儉。而不事華飾。況有良友朋。時來慰岑寂。全家免寒餓。幾欲忘旅客。胡爲復舍此。僂僂就行役。軒車遠追送。酒至淚輒滴。還鄉人所樂。我獨愁苦劇。故山有松栢。摧折爲荆棘。豈無骨肉親。太半生死隔。此語不可聞。此景那堪覲。愁情如波濤。瀕洞胸與臆。佇立向穹蒼。一歎雙鬢白。

雨中雜詩四首

久晴思得雨。旣雨久復厭。廣庭屯陰氣。平陸就昏墊。淒風吹人寒。朱火黯無燄。水衣上高墉。泉溜發枯塹。青泥沒達道。寸步不可覘。慷慨成感傷。纏綿積憂念。首夏涼風生。朝樹結晚色。濛濛細雨交。慘慘原野黑。衡門長藜莠。壞壁穿荆棘。念彼征戍兒。沾濕荷戈戟。

囊囊罄留貲。菴菽難充食。供輸既乏絕。戰鬪何時息。巢居者誰子。鼠竄延晷刻。田疇沒蓬蒿。無處勤爾力。晏天高寥寥。仰視不可極。

多雨損萬物。草爛麥生耳。青苔獨得時。延蔓及堂庀。晨興視天宇。滴瀝殊未已。君子懼陸沉。小人憂餓死。淒涼大將營。鼓纒弧弓弛。朝廷竟知否。盜賊如流水。

離居感時節。寤寐不遑安。青燈晦壁角。簷溜如崩湍。屈指計日月。殷憂集多端。蛙黽爾何知。叫噪喧草莞。中夜攬衾裯。淒淒陰氣寒。鳳凰鍛羽翼。卑飛避鳴鳶。撫几一長歎。聲出心已酸。

次胡元望郊行詩韻

誰言公館清。晨氣晚未散。豈乏樹葱芊。尙有花爛熳。美人隔巷陌。可念不可喚。溫溫夜光璧。幽草潛璀璨。鄙夫競喧譁。達士善大觀。世情如秋蓮。零落風中瓣。少年喜紛紜。談笑輕絳灌。進取務出奇。周慮非習慣。逝水難重迴。芳時愁坐換。元臣鎮方面。邊戎仰成筭。應憐四郊外。荆棘滿耕畔。悽悽憂葵女。惻惻撫床瓘。興懷增感傷。展轉過夜半。起行視青天。星河色凌亂。安能作野馬。脫略謝羈絆。

秋夜感懷柬石末公申之

不寐知夜長。起視天宇闊。散漫草上風。朦朧雲間月。寒禽鳴疎樹。黃葉墮階闕。俛仰觀羣物。惆悵不敢發。誰云螻螻壤。能使泰山旣。蒼鷹鍛六翮。狡兔營三窟。何當威弧正。王旅得肆伐。菌籟雖微材。尙可施羽筈。豈意風浪舟。心猶隔胡越。士生非金玉。有足難自達。周際不恤緯。楚放常懷闕。平生葵藿情。忍與霜露歇。玄水膠坤軸。非君孰能幹。申章匪繁辭。悲憤不可遏。

次韻和石末公用元望韻遣興見寄

鴉鳩勸春耕。梓鼓帖宵邏。拊循餘暇日。珠玉生咳唾。時維青陽初。天子在左个。布德順木令。萬國罔不和。祿食自紛紜。撫字誰最課。幅員若金甌。絲髮無罅破。涓溜可摧山。機禍不在大。中夜登高樓。遙瞻太微座。乾坤澹寥落。日月飛鳥過。憤惋空有心。盛時嗟已蹉。

以野狸餉石末公因侑以詩

野狸性狡猾。夜動晝則潛。繫之籠檻中。耳弭口不咤。當其得意時。足爪長且鈿。跳踉逞俊捷。攫噬靡有厭。貧家養一鷄。冀用易米鹽。爾黠弗自食。尋聲竊窺覘。破柵舔肉血。淋漓汗毛髯。老幼起頓足。心如刺刀鎌。東鄰借筌蹄。西鄰呼獼獪。繫餌翳叢灌。設伏抽陰鈐。彼機歛已發。此欲方未飲。絲繩急纏繞。四體如繭黏。野人大喜慰。不敢私烹爨。持來請科斷。數罪施剝剗。使君鎮方面。殘賊職所殲。械送致麾下。束縛仍如韉。腥膏忝污鉞。羶醬或可醃。萋芳和精醬。願賜警不廉。黃雀利螳螂。碎首泥塗霑。烏鴉殉腐肉。噴墨身受淹。此物亦足戒。申章匪虛訥。

和石末公種棘用胡元望韻

力役困年侵。種棘代遮邏。豫防苟無失。有地孰敢唾。風條曲抽乙。雨葉細垂个。是時春載陽。土脈如膏和。分疆督藝植。勤惰各有課。揮鋤綠煙披。轉石蒼蘚破。稍看萌蘖長。漸覩根株大。結蔭冒長堤。開花映高座。猿公不敢窺。貉子那得過。慨慕陶公言。罔俾分陰蹉。

得令字

勾芒發陳根。北斗轉東柄。衆星各參差。威弧何時正。好生雖聖心。明刑亦王政。哲人慎謀始。斯焉獲終慶。徒言兩階舞。可以懷逆命。不見三危山。萬里竄梟獍。世德異唐虞。民情好爭競。那無跗扁醫。而有膏肓病。波濤地軸顛。虎豹天關覓。雨露當春滋。風霜及秋勁。誰能奉明主。順天行號令。

正月二十三日得台州黃元徽書有感三首

世亂網恢恢。斯人亦淪駁。數奇當何如。窮途難爲計。盲風振喬木。碩果失其蒂。虎豹落機檻。坐服輿阜制。玄珠迷罔象。白日慘陰暄。涉水水有蛟。入山山有虎。棄馬感須無。直道懷柳惠。青冥無羽翼。悲來夜迢遞。結交無疏戚。艱難見平生。金石苟不渝。萬里如兩楹。重山非云遠。邈若遼與荆。孀婉豈不懷。蛇虺正驕悍。手持故人書。心念故人情。開書問故人。淚下如雨傾。

客從何鄉來。遺我尺素書。道路險且艱。故人情有餘。妖氣晦斗極。黃濁混龍魚。何莖不爲猶。何麟不爲龜。殷勤故人心。炯若明月珠。投之千丈泥。萬古光不渝。安得致闔闔。以照君王車。

次韻和石末公春雨見寄

愁陰沴陽景。孟春猶苦寒。騰雲湧巖岫。落雪蔽江干。街衢溢黃潦。井谷生狂瀾。誤疑蛙黽窟。中有蛟龍蟠。復憂扶桑日。坐爲黃濁漫。顧瞻望四郊。側足不遑安。卻秦慕魯連。存齊想田單。玄髮雖向改。壯心終靡殫。小人務苟且。君子慚素餐。高牙對多壘。肉食徒王官。周綱雖云弛。一匡賴齊桓。莫驚溝澮盈。雨息當自乾。

次韻和石末公春日感懷

下澤潢潦集。幽林光景遲。羈禽有哀響。槁葉無半姿。梁稊不同畝。世事久當遺。便欲駕扁舟。泛彼湖上澗。

慨懷祈招賦。愴惻感遐思。流光逐飄風。去若六馬馳。干戈尙雜遝。舉目多可悲。步登西城樓。還望東城陴。近悼春陵吟。遠傷鴻雁詩。未能已怨怒。矧暇防笑嗤。賴有賢大夫。直道人不欺。相期各努力。共濟艱難時。

紫虛周道士還俗多年而貧老如故元帥石末公憐其無依復令歸觀就養

白鶴棲青松。願與人世違。松高風露寒。卻向人間飛。江湖無稻粱。歲莫將疇依。稽首浮丘公。涕淚灑毛衣。浮丘憐老鶴。解悟既往非。浴以丹池泉。照以若木暉。儻然骨髓清。還向青松歸。松葉煙茸茸。松華霧菲菲。可棲復可食。其樂天下稀。如何從鴈鶩。喋呶圖身肥。

偶興

勞人怨長途。壯士悲老別。那將望鄉心。對此傷神月。淒涼寒風至。惆悵芳草歇。瑤琴無子期。絲弦爲君絕。

雜感

崎窮傷往事。晚莫悔前非。流光不相待。逝川那可追。佳期隔河漢。日夕千里思。鴻鴈西北來。安能從之飛。佇立望明月。天霜夜沾衣。

黃慎之自閩見訪夜坐對酌悵然有感

故人一爲別。七見秋夕月。今日見故人。故人鬚髮新。世情如鬚髮。故人當識察。車輪東北馳。車轂終不移。倦暑伏菅蒯。白汗如流瀉。開門見故人。謂是天上。新人各自媚。故人何爲者。斧斤入山林。松柏化灰燼。寄語風胡子。莫恠金躍冶。

煌煌華燭輝。扇扇飛蛾翼。羲和倚扶桑。恨無夸父力。大鵬雖有能。萬里亦一息。可憐千斤牛。坐受鼯鼠食。

故人髮猶黑。故人心尚赤。人生一世間。幾見駒過隙。南山有喬松。翠鷓鬪顏色。般倕不收錄。野火恣焚炙。枝枯榦亦折。雪霰交洒淅。中心有流液。入地化爲石。遺之五百年。猶堪補青天。

鄭同夫餞別圖詩

江上潮始白。林端霞半紫。微風颺歸帆。紅葉隳行子。芳醪恥金樽。清歌猶在耳。馬鳴不見人。愁來若流水。

旅興五十首

初秋積雨過。衆綠光如濡。莎雞啼高樹。蟋蟀鳴塔除。時物已改故。芳年從此徂。榮名非我願。守分敢求餘。登樓眺遠郊。肆目望天衢。明月出雲中。照我華髮疎。還歸掩關臥。夢到園田居。

憶年二三十。笑人不能勤。誦書歛萬言。落筆飛煙雲。有朋自遠來。講論窮朝曛。一藝恥不知。高蹈躡前聞。寧知有衰老。耳聾目如熏。身世且未保。況敢言功勳。

老不與懶期。身老懶自至。懶不與傲期。力憊難強事。茫茫視天宇。忽忽心如醉。勞生諒何庸。顧爲形所累。弱水隔蓬萊。安得生兩翅。

秋風肅萬物。百蟲競號鳴。螻蛄最可憐。切切悲其生。屣履步庭除。素月圓且明。翫之不可掇。渺焉忽西傾。回身掩房闔。愴悅煩慮盈。太息以終宵。展轉難爲情。

傲福非所希。避禍敢不慎。富貴實禍樞。寡欲自鮮吝。疏食可以飽。肥甘乃鋒刃。探珠入龍堂。生死在一瞬。何如坐蓬華。默默觀大運。

紫燕來我簷。營巢養其雛。拾蟲撲我衣。銜泥污我書。雛成復生子。風雨同安居。一旦捨我去。瞻之起長吁。

死別不可追。生別那可思。悼往恨節促。待來悲時遲。

人生百歲間。苦樂相牽攀。念生復念死。何時一開顏。登高望八荒。目眇飛鳥還。有願不克遂。淚下空潺湲。秋氣雖可悲。秋色亦可悅。寥寥天宇曠。皎皎縣象晰。鴈來山葉紅。龍臥江潭潔。彼美黃金花。含英耀窮節。佳人不可期。明月圓復缺。空庭夕陰盡。露草白如雪。佇立望四方。彌使憂念結。

窮巷屏人跡。開門見青山。青山似故鄉。客子何當還。蟋蟀日夜鳴。綠樹亦已殷。白日駛西征。浮雲不可攀。安得生羽翼。奮飛出玄間。

雨來羣山暗。雨過羣山明。山明猿鳥喜。山暗猿鳥驚。歲暮陰風起。白日西南傾。寒蟬枝上號。夏蟲草間鳴。人生非草木。能無感中情。

赤霞變玄雲。風起煙霧塞。颼颼木葉響。噎噎原野黑。青泥沒委巷。關塞生咫尺。水深蛟龍恣。山濕鳥獸寂。留滯荷戈人。艱難去鄉客。翹首望太陽。憂思萃朝夕。

望舒乘罕車。潛輪躍重淵。二儀煙霧交。九澤風雲連。丘陵冒潢潦。溝澮成通川。鶴鶴失其巢。窮緩鳴可憐。蛙黽一何樂。喧呼聒宵眠。

西岑掛朝隴。東嶺垂日腳。唳唳埵鶴鳴。矯矯淵輪躍。淒風拂喬樹。密雨翳林薄。煌煌籬下花。粲粲黃金萼。含英不自衒。守分甘寂寞。願持獻美人。恐貽觀者愕。

晁景無還暉。霜露淒已繁。松栢坐樞翳。桃李更何言。旦夕悲風起。黃沙蔽平原。萬物盡凋落。芳華誰獨存。我願化爲鶴。不願化爲猿。鶴鳴聲聞天。猿鳴煙雨昏。空林夜寥寂。躑躅傷精魂。

西風吹碩果。草茅思索綯。撼撼卉木零。唧唧寒蟲號。百川日夜流。泰山何其高。沉浮自有定。汲汲無乃勞。久雨得晚霽。豁然如醉醒。幽花銜餘紅。遠峰出孤青。獨坐無與娛。蜻蛉吟空庭。良辰能幾何。逝者忽如傾。歌欲自慰。歌竟還傷情。

微風振簷鐸。瓊如環珮響。登高看秋色。俯見明月上。木落天地寬。雲散川原廣。來者不可期。逝者日已往。離居豈無懷。惻愴縈遠想。

日暮登高臺。流目盼雲間。雲間有明月。窈窕芙蓉顏。光輝被四表。萬古一往還。惜無騰化術。仰之不能攀。江上秋風急。天寒鴈南歸。客子晷長途。中心一何悲。顧瞻望四方。有懷當告誰。霜露日夜零。百卉厭其枝。衰謝不待期。榮盛安可追。太息復太息。愴恨涕沾衣。

薄雲斂微雨。返照涵空煙。黃葵間紅蓼。爛苦澀錦鮮。老病若無歡。坐爲憂所纏。自恨非松喬。不能還少年。援琴寫此曲。曲盡心茫然。

少別無慘容。老別有苦心。筋力已非故。憂思諒難任。春風吹郊原。雜英滿園林。物生無巨細。各以類相尋。含情曷能忘。矧乃衆病侵。勿言愁可量。滄溟未爲深。

翔鷗搏扶搖。九萬一奮翅。驂騑驟康莊。瞬息千里至。谷紉穴坎窞。揚鷄集蓬蔚。偃仄豈不憐。飲啄亦何忌。夸父空有勇。精衛良無智。翼折海未枯。身償杖徒棄。何如抱區區。保已遺世事。

倦鳥翼安巢。風林無靜柯。路長羽翼短。日暮當如何。登高望四方。但見山與河。寧知天上雨。去爲滄海波。慷慨對長風。坐感玄髮皤。弱水不可航。曾城岌嵯峨。淒涼華表鶴。太息成悲歌。

病身如朽木。蟻蟻羣萃之。生意已無多。雨露空相滋。晨興步庭除。足弱幾不持。論年未應爾。胡爲遽如斯。大塊播萬形。一軀非我私。暫假終必還。但有速與遲。居易以俟命。聖言豈吾欺。

上古人一心。生榮死同哀。末世自爲心。骨肉多嫌猜。沉沉十日雨。漫漫百畝苔。苔深車輪沒。平路生蒿萊。嗚呼張仲蔚。衡門何由開。

踈庸厭人事。疲病畏交游。得閑願已愜。敢有分外求。開門對鍾山。山翠盈我眸。日中市聲遠。草綠空庭幽。登臨觀萬象。玄理足可搜。誰能走逐逐。自使生悔尤。

別離多苦懷。三年當百載。來者非所知。往者今安在。浮雲旦夕起。白日埋光彩。天地亦有形。豈能長不改。去去東園公。紫芝猶可采。

晨興梳短髮。庭樹生秋風。萬物有容色。與故各不同。碩實屬老成。天柔怨童蒙。英英黃金花。旒旒清露叢。歲暮等淪落。何異蒿與蓬。

庭前草華發。夜涼螢火流。有懷不能寐。起望女與牛。那無一葦航。繁念空悠悠。淚如宵露零。散漫不可收。四月陽用事。羣物咸長榮。靡草雖就死。玉瓜亦復生。死生誰所致。時至莫能爭。達人洞神理。守分絕外營。脩身俟天命。萬古全其名。

仲仲坐虛室。暖暖日向暮。空煙斂曾岑。暝色半高樹。緬邈起遐思。逍遙散輕步。嬋娟天上月。的皪草間露。物情豈異昔。人事殊非故。芳歲不可淹。衰年況多慮。諒無彭鏗術。頽齡那能駐。

天天芙蓉花。向晚猶媚嫵。娟娟明月輝。粲粲當庭戶。寒衾耿長夜。夢寐空自語。勞生遘六極。老病在羈旅。

將思訴穹玄。恨無搏風羽。

大火沒西南。晝短宵已長。志士鬱慷慨。老年怨淒涼。蕭蕭草蟲鳴。肅肅蒼隼揚。物情各有定。人意苦不常。踟步陟崇丘。流日睇康莊。寧爲款段駑。勿作騏驥良。款段駕鼓車。道里有限量。騏驥被重甲。力盡百戰場。死骨賣千金。雖貴亦何償。

人生如浮雲。聚散無定期。驚風一飄蕩。各自東西之。粲粲陵茗花。淒淒寒露時。浮雲不可駐。顧盼空齋咨。青青瀟湘竹。猗猗被寒水。遊子如飛蓬。佳人曠千里。登高左右望。但見黃塵起。鳳凰翔不下。梧桐化爲枳。傷懷不可道。憂念何時已。

吾觀穹壤間。萬變皆有窮。何如順天道。原始以知終。清晨攬衣起。絺綌生秋風。雖雖鳴鴈來。灼灼酸棗紅。悵焉念所思。悲感集予衷。佳期在何許。瑤草成枯蓬。佇立望日月。勞心極懣懣。

少年不信老。恠聞老人言。忽忽老到眼。卻憶少年愆。逝川莫回流。烏兔日夜奔。憂思集方寸。鬱氣如雲屯。試爲少年道。聽之亦茫然。願謂少年子。聆我爾汝篇。爾未及我耄。我曾猶爾妍。勸爾無我厭。勿令人爾憐。今日復明日。明日能幾何。壯心簫索盡。思念恆苦多。引領望故鄉。川路猶且長。巢燕已北飛。賓鴻亦南翔。我獨無羽翼。慷慨中自傷。

烏鳴朝啞啞。鵲鳴暮啞啞。聞鵲既不喜。聞烏復何憂。世人務苟得。君子絕外求。滄浪迅風波。無風卽安流。胡爲自冰炭。以貽達者羞。

巖風萃羣有。蠅蚊亦無多。所憎雖去眼。若此歲晏何。中夜攬衣裳。起視星與河。出雲未還山。落葉早辭柯。

沉思不成寐。大息繼以歌。

寒燈耿幽幕。蟲鳴清夜闌。起行望清天。明月在雲端。美人隔千里。山河杳漫漫。玄雲翳崇岡。白露凋芳蘭。願以綠綺琴。寫作行路難。憂來無和聲。絃絕空長歎。

秋山青如煙。秋月白如水。登高俯空曠。咫尺見千里。悠悠孤雲行。嫋嫋涼風起。涼風吹客衣。客心隨風飛。願作滄海潮。朝來莫還歸。

泊舟嚴子瀨。遙望仙華山。中有騎羊人。皓齒頰玉顏。餐霞飲沆瀣。坐石濯潺湲。長嘯起天風。落日爲之還。悠悠隔雲雨。杳杳不可扳。

日落天氣涼。逍遙步庭墀。蟋蟀已在宇。鴻鴈來何遲。少壯輕遠遊。衰老傷別離。念我親與友。各在天一涯。音容兩契闊。悲歡絕相知。鍛羽懷舊林。膏鱗思故池。百年能幾何。逝者无還期。俛仰增感歎。有懷當語誰。殷勤託宵夢。聊用慰所思。

久旱草不生。一雨青滿地。新萋與舊枿。好醜各自媚。啾啾黃鶯吟。習習玄鳥至。閑庭人跡稀。白日澹清氣。平生孟公綽。庶足無妄覬。但願長若斯。撥置身外事。

江城夜來雨。雷音亦何砰。今晨視郊原。草木皆發榮。雙雙布穀兒。來我牆上鳴。園蔬猶可藝。無忘及時耕。倦翮得安巢。感荷天地生。

浮雲西北起。飛雨東南去。微微若輕煙。靄靄如薄霧。臥疾少出門。不知春已暮。芳年復幾何。冉冉征鳥度。花落有再開。水流無回注。坐念入杳冥。明月在高樹。

秋高潦水涸。晏天亦淒清。枯籟響悲音。羈蟲振餘聲。噫噫落日暉。慘慘游子情。風林無定枝。馳車鮮安旌。自愧匪賢達。默默嗟其生。

山鬼處幽壑。自分不見天。寧知無私照。及此暗井泉。倦鳥思故林。窮魚思故淵。感荷實難忘。庶其保終年。鑿羽畏高風。疲馬厭長道。玄陰促暮節。何物能不老。自非松栢質。敢冀出衆草。登山臨流水。及此晴日好。春芳藹蘭蕙。秋實粟稭稻。黃精肥可食。石泉清可澡。榮名何足言。息心以爲寶。

感春六首

種桃望食實。種柳期成陰。春風應時至。雜英滿園林。黃鳥多嘉聲。鳴鳩亦好音。勿言荏苒質。不如松與椶。託根信永固。豈乏歲寒心。

孤坐不自適。興言出行游。凱風吹衣袂。白日光悠悠。來牟秀彌野。荷芰葉已抽。行游豈不好。顧盼無與儔。回身掩門坐。隱几聞鳴鳩。

日暮東風起。滄江水微波。水深不可涉。路遠將柰何。靡蕪葉已齊。故鄉隔山河。盛年難再得。芳意其蹉蛇。朝采山上蕨。暮采澗底薇。雖無梁肉味。聊可以御飢。羔羊薦美酒。飽食同象犧。玄廬苟未閉。彼此誰是非。春風旣和柔。春日更皎潔。天桃紅如錦。繁李白勝雪。黃蜂與紫蝶。亦各競時節。人生有憂樂。譬彼天上月。願言良其背。無使心自蕪。

人生多憂患。死去百患消。但恨不得。無由脫鞶鑣。浮榮衆所貴。何異掠草焮。一生與一死。一夕復一朝。周器忌盈滿。老子戒矜驕。園林無恆芳。江海有回潮。委心從大化。庶幾永逍遙。

遠遊篇

三山六鼈背翠水扶桑東。鷄鳴上海日。海面玻璃紅。仙人騎鸞鳳。呼我游雲中。雲中有金闕。謂是天帝宮。明星列雨藩。琪樹光玲瓏。太一坐端門。白髮映青瞳。授我玉篆文。赤蛇蟠九虹。出入元化先。壽命齊老童。因逢青鳥使。遂造東王公。素女如蓮華。歌喉絃管同。顧盼動環佩。振迅若輕鴻。化爲五色光。倏然隨長風。

秋夜聽冷協律彈琴分韻得夜字

秋清衆籟寂。華月耿遙夜。玉琴奏瑤席。逸響發高樹。微微風入林。稍稍泉出罅。關關黃鳥春。嘒嘒玄蟬夏。幽憂北艷語。赫怒西楚咤。初疑廣寒府。和響起仙駕。忽驚龍騰霄。雷電劈太華。淒涼漢宮女。萬里異國嫁。逍遙商山老。芝歌意閑暇。斯須變暄涼。要妙奪造化。終焉返淳朴。瑚璉在纒藉。鄭衛失其淫。儀秦失其詐。虎狼失其攫。烏鳶失其嚇。大音信希聲。餘美甘如蔗。持此滌塵心。永興箏笛謝。

雜詩 七首

趙女工妙舞。秦娥善清聲。同入楚王宮。各擅傾城名。宵陪綺席宴。夙侍金輿行。常恐他人至。得寵分恩榮。涕泣奉顏色。冶態隨風生。願爲松栢枝。莫作日夕英。開花不結實。坐傷秋露零。

白露出草根。顆顆如明珠。黃華炫金錢。亦復盈堦除。閑居無尤物。翫之聊可娛。衡門不必扃。此非衆所須。但恐成蕙苴。千載令人吁。

服力徇穡事。屹屹望有秋。凌晨荷鋤出。日入且未休。中夜看星辰。早潦切所憂。西成告豐歲。珠璣滿田疇。飽食幸可期。喜色欲盈眸。寧知霜雪早。零落不得收。荒畦委滯穗。權籬掛空篝。斜陽照白髮。短褐還飯牛。

天命固如此。汲汲復何永。
季世罕上壽。百歲爲長年。
軒皇不可見。顏冉復誰憐。
安期乘彩虹。羨門駕紫煙。
朝游蓬萊鳥。夕宿曾城巔。
常恐聲風枝。摧折滄海田。
徒令驪山客。想望稱神仙。
月明棲鳥動。月暗棲鳥定。
茅鷗潛枳枸。大眼掛宵鏡。
皇天生萬物。一物界一性。
遂令蓋壤間。擾擾事爭競。
喧呶窮日夕。豈不慙天聽。
化工雖云巧。爲法祗自病。
沉思令人嗟。欲問誰與應。
蒼蒼山上松。濯濯庭前柳。
亭亭拂雲起。矯矯含風久。
佳人皎如玉。曠世難爲偶。
長歌繼以歎。去鳥盡回首。
昔爲瑤草華。今爲蠹餘枉。
棄置勿復道。華容不如醜。
速成非良器。驟得難久好。
桃李望春舒。亦復迎秋稿。
薜英耀朝日。未夕委蔓草。
飢農種植禾。自慶得食早。
歲暮寒溼冽。衡門淨如掃。
瀛洲對方壺。弱水爲池沼。
不有千年花。安得如瓜棗。
徐市駕樓船。輕帆迅如鳥。
仙人倘可見。常恐三光老。
寄書附文鱈。碧雲空縹緲。

旅夜四首

月光天上來。入戶清如水。
游子忽思家。披衣中夜起。
徙倚步回廊。烏啼夜未央。
欲飛無羽翼。零淚濕衣裳。
昨夜起觀星。月在楊枝上。
今宵不見月。星影空搖漾。
羽蟲飛拂戶。燈吐孤火壯。
佇立掩衡門。愁來獨惆悵。
客愁常突兀。今夜燈花生。
雖知無喜報。愁亦暫時平。
解襟成獨寢。留燈待天明。
喜固不可求。客心恆畏愁。
六街馬憧憧。鍾響聲暫歇。
兩星光灼爍。中有如眉月。
既見月如眉。還看月如鏡。
月光自有恆。人心長不定。

遣興

春至日色好。白水生青煙。江梅已堪折。園柳亦可憐。鳥鳴山芳菲。魚躍波漪漣。人生覆載間。與物共推遷。守分絕外求。何者爲憂煎。但願有酒飲。無事驚晝眠。卽此是至樂。安用松喬年。

送葉景龍之通州同知任分韻得勳字

泛泛水上漚。飄飄空中雲。俱爲無根蒂。搖漾隨網縑。北風厲玄冥。霜雪下紛紛。送子陟長道。鴈聲不可聞。盛年復幾何。逝川去法泫。朔方沙漠地。雜沓駝馬羣。居庸接太行。華豹所由分。陰山茹毛國。未嘗識耕耘。自古所攘斥。比之鹿與麇。汴京失其馭。冠裳倒玄纁。否極泰則來。天生聖明君。揚旗指大荒。旄頭落胡氛。玉帳萬貔虎。爪牙天將軍。子行勿歎勞。襲芳衣必薰。君恩重山岳。矧敢負以蚊。丈夫有壯志。曷問武與文。不見傅介子。盛烈光典墳。奉子一盃酒。別離安足云。時哉諒有會。勉旃樹功勳。

送張孟兼之山西按察司僉事任

平明集冠蓋。祖帳清江濱。天縣赫曦日。山湧崔嵬雲。大舶發中流。碧水龍鱗紋。宿雨霽初伏。川原無垢氛。脩楊蒼深綠。禾黍氣如饌。蘆荻響微風。鶴鶴鳴相聞。市酒雖云薄。情至心自醺。贈詩雖不多。芳意同蘭薰。丈夫樹遠業。兒女徒紛紛。農夫務去草。穉穉職所耘。蒼鷹司鷲擊。梟鸞慎其分。利劍斷犀兕。不數雀與鵝。籌邊有廟筭。樽俎茂奇勳。巍巍太行山。蒼翠浮網縑。萬古戒華戎。峻極通天文。老罷當道臥。氣讐狼虎羣。引領望征旆。迢迢隔河汾。營平曜前烈。定遠揚後芬。制勝在兩楹。豈必疲三軍。功成早歸來。華袞昭玄纁。

送胡生之定遠教諭任 爲陶中立參政作

青陽獻嘉歲。萬物生華姿。柔桑莢綠英。新柳楊黃蕤。祖帳送行人。大舶艤江湄。管絃發清音。甘醴溢瓊卮。

歡情既已暢。繼繼申以詩。丈夫生世間。出身事明時。有材必有用。譬彼桐與椅。緼之朱絲絃。彈以格神祇。一奏獸率舞。再奏鳳來儀。校官職敷教。位小任匪卑。棟梁自勾芒。翀霄起陂池。仕學猶兩翅。對舉不可遺。努力慎保愛。勳名以爲期。

送駱起原之新城知縣任

憶在越王城。與子共翱翔。子實才俊士。舉止安且詳。溫如春雪消。日照璆琳琅。一別二十年。塵沙翳玄黃。淒風拉梧桐。霜露摧篔簹。浮雲變白黑。各在天一方。邂逅忽相逢。悲喜交肺腸。故情豈不懷。王事不敢違。倏歛復爲別。安德不慨慷。西江富文彥。其俗淳以良。念我別來久。愴恨增感傷。英英江梅花。皎皎晞晴陽。折以贈子行。侑之以短章。萱草亦已生。鶴髮在高堂。征鴻漸于遠。擢翻陵八荒。行將儀大廷。鷓鳳參頡頏。陟遐必自邇。永矢莫相忘。

連江陳子晟師古齋詩二首

祥麟踏魯藪。王道遂湮淪。秦坑扇灰燼。六籍失其真。茫茫穹壤間。談舌紛輪囷。鷓鴣指爲鸞。杞梓斯爲薪。所以尙志士。慷慨思古人。造行擬淵騫。吐辭追孟荀。不羨季氏富。而甘原憲貧。不榮桃李容。而效西施顰。臨川翫清瀾。味道劇淳珍。誰云泰岱高。布武期必臻。誰謂江漢永。利涉由通津。有爲亦若是。此語非徒申。衛武陳抑戒。瞻聖垂芳名。呂公著丹書。君臣同顯榮。伯玉願寡過。使者知其情。柳惠志直道。身匱德乃盈。古人如良金。百煉彌剛貞。悠悠萬載下。日月同昭明。聖人有遺訓。可畏在後生。服膺慎勿替。竊比於老彭。西風振枯柯。涼月澹光景。門前馬蹄歇。室虛心獨靜。焚香對六籍。耆味知雋永。懷人若在眼。酌潦何必涸。

尼父訓九思。子輿明三省。康莊無他岐。車馬日馳騁。捷徑善摧輪。此意當默領。

題李太白觀瀑圖

憶昔李謫仙。泛舟彭湖東。遂登廬山頂。直上香爐峯。遙望瀑布水。自天垂白虹。大聲回九地。浮光散虛空。萬木震辟易。千崖殷鍾鏞。清涼入肌骨。如歸廣寒宮。賦詩留人間。至今響泚泚。丹青極摹寫。欲代玄造功。逸駕不可追。舉頭睇飛鴻。倚歌無人和。引袖乘長風。

劉宗文菜窩遣興

歲暮寒氣冽。今晨頗和緩。登高眺原陸。陡覺生意滿。日色照地黃。墻影看漸短。草抽識土膏。魚出知泉暖。吾生亦天物。安得不樂衍。且復攝其蔬。獨酌慰衰晚。

新春

昨夜東風來。吹我庭前柳。柳芽黃未全。草根青已有。鵲鳩屋上鳴。勸我嘗春酒。我髮日已白。我顏日已醜。開樽聊怡情。誰能計身後。

送醫戴原禮歸金華

岩岩金華山。上屬匏瓜星。紆餘帶江海。窈窕儲仙靈。陰谷泉夏冽。陽崖草冬榮。帝女降清夜。龍鸞夾雲駢。旭昱五色光。天葩播芳馨。初平剽元氣。騎羊遊玉京。宗公秉節鉞。稜威愴邊庭。呂子傳聖學。出辭樊六經。陳生挾英才。雄辯摧五兵。至今文彥士。綿綿若連城。子兮抱奇術。爲人駐危齡。運鍼號二豎。養齊泣三彭。歲晚趣歸裝。日照千山明。澗阿多石芝。玉色味如錫。可以實肌腸。化骨爲瑤瓊。或可分餉否。相從翺紫清。

怨詩

屈原沉汨羅。不忍棄其宗。葦弘志存周。寧爲一己容。申生顧父愛。殺身以爲恭。子車守明信。殉死安所從。之人豈不賢。揆道猶過中。卞和獨奚爲。抱玉售瞽聵。朋足實自取。怨泣情何鍾。文豹處幽林。無人識其蹤。誰令貪雞鶩。以觸弋與蠶。糜身獻厥皮。爲人作妍容。娟娟芳蘭花。託根千仞峰。下有孤飛泉。上有灌木叢。歲晏不改色。霜清香更濃。韜光遠人禍。委命安天窮。道得復何怨。老子其猶龍。

秋懷八首

東風吹晨霞。初日垂白足。濕煙屯簷棟。飛雨鳴樸櫨。厭厭葉就黃。萋萋草還綠。索居謝喧囂。庭絕車馬躅。念來多所懷。追往不可復。嬾隨老共至。病與年相促。省躬慚寡尤。守分無望福。鴛駘立皂櫪。敢慕騏驥逐。秋熱喜稍退。秋雨又成霖。涓涓屋溜瀉。汨汨街泥深。清寒中筋骨。濕氣薄衣襟。晤言靡與同。孤坐難爲心。俯視青苔積。仰睇玄雲陰。弱質昧聞道。乃爲憂所侵。冥冥至終夕。悄悄成孤吟。

空塔走穴蟻。荒埳唳巢鶴。陰氛方騰達。密雨已彌漫。沉沉翳光景。昧昧感昏旦。林鴉濕休飛。簷雀饑相喚。跬步隔關河。四望空慨歎。悽悽衣裳單。戚戚歲年晏。微生如石火。徒勞暫時煥。永寤爛柯人。萬事一夢幻。清晨啓扉坐。微風動游龍。離離墻上花。切切砌下蛩。嗷嗷自成音。灼灼各有容。四序迭推移。衰病情所鍾。身羸足已弱。有願不得從。愧負天地生。愴恨填心胸。

蟋蟀已在宇。鴻鴈方來賓。天秋風露寒。陰谷何時春。欲爲商聲歌。恐驚梁上塵。衡門掩仲蔚。庶用存吾真。飽食無一事。一日復一夕。倚門望圓穹。白雲在空碧。來鴻與去燕。歲晚各有適。英英黃金花。粲粲好顏色。

采擷貴及時。霜露已盈積。掩門還獨坐。浩然懷往昔。惟有故鄉夢。可以慰岑寂。
兩息殘暑退。涼氣何淒而。羈人倦遙夜。明月光在帷。展轉不成寐。披衣步前墀。春芳不再穠。夕露空華滋。
泯默對青燈。悵焉心思。

薄雲散高風。天色青如染。盈庭露輝輝。當窗星燄燄。寒來愛蘭釭。暑往卻筠簟。憂思浩無際。起坐數更點。
晦明相代謝。避盈乃無歉。未嘗陟孟門。誰識行路險。賈害豈無因。戒之在懷琰。冥豫何可長。用之以自檢。

